

Kiwapotai owera Iesu Keriso aboudo ie

¹ Nedi buka ro owera nato tiamo urubia ro umoro koi tato tanaro Iesu Keriso ro Ioane aboto nou giwapotai-ro. Nedi tanaro ro Godi aboudo ie, ina Iesu Keriso ro nou giwapotai-ro nou sowake urubia aboto, beda tanaro ra aupise ie amadimo-ororosioidi-ro. Iesu edi sowake urio ro nou gemeiriai-ro nou sowake dubu Ioane aboto, nedi tanaro sirio ro iwapotai ri.

² Mo Ioane nouse ie, mo ro nedi morobise tanaro sirio ro niauri simara idomari to ibo Godi edi owera ro Iesu Keriso ro giwapotai-ro mo aboto, morobise to noti niatiti.

³ Godi edi ipusu owera ro nedi buka ro nato na-iamo, etio ro ioputi-dumo neio ro meana tiauri-dumo, ibose etio ro irowidiro-dumo ina durupi to aise na-isioidiro-dumo, nedi urubia ro meana tiauri-dumo. Mabau tau aupiaupi ro orobowado-die nedi tanaro sirio ro kororosioidiro aboto.

Ioane ro owera gemeiriai Iesu urubia aboto

⁴ Mo Ioane ie nedi peba titi owera ro mo ro nimeriai Iesu urubia aboto 7 awawo sabowa ato na-orowomidiro Eisia duriomoro ato na-iamo.

Godi keba ia se na-imidirotiti, abora na-omidiro, ina ido ama-imidirotiti-ri, wisa tato nirimagare miro mutu nou aboudo nio abato aise ba-miamotiti. Ibose Godi edi Tarena Uriro 7 tanaro mutu, Godi komidiro nakomu edi na ro

emotoititi, wisa tato nirimagare miro mutu nou aboudo nio abato aise ba-miamotiti.

⁵ Ibose wisa tato nirimagare miro mutu Iesu Keriso aboudo nio abato aise ba-miamotiti. Iesu Keriso ro *Godi mea se owautiti*. Iesu nou keba koroto mere sosoro ie. Mabu nu keba dubu e Godi ro pamo rido imese gowameai-ro.

Duriomoro gabogabo eputa urubia to edi urubia ro araratorotiti-dumo, Iesu *eputa dubu kaupoti nou se ie, neio nou ro sopu to iaurititi-die*.

Nimo nirimagare Iesu ia ro nimatiti-die, ina nimo edi ubauba sirio ro nou na-garaburai nou edi karima ro na-gosuputi neito nimapoduti.

⁶ Nimo Iesu ro *ta-nidabuai nu edi kiwaboi maumo ro nato orowomidiro ri, ina Godi ra urubia ra turituri ato* Iesu edi abera ro Godi nou woko iato emesioidiro ri. Ina noudo ie auna masiro pupuwo korosa mutu nou abato womu tato womu tato aise ba-miamotiti. Ibose ba-mororosioidiro-mo!

⁷ Ba-dowea-mo Iesu *tema ohu rido amadi-ororuwo-ri*. Nu imese sirio ia urubia ro simara idomari to *amadimo-owea-ri*. Nu edi tau ato garaburai ubauba etio ro gowai-rimo, nu ibose neio ro *amadimo-owea-ri*. Nedi duriomoro ro nato na-orowomidiro sirio erere oweru urubia neio idobi *amadimi-iroto-ri*, neio ro nu sosoro *namadimo-owea-ri*. Morobise ie! Ibose ba-mororosioidiro-mo!

⁸ Abera Naramu Godi ibo aro-die, 'Keba moro mo do ie, saro gabo mo do ie, imese namabu mo ro ta-nimapogai.' Imese pupuwo ia Godi keba ia se ta-imidirotiti, abora tomidiro, ina ido ama-imidirotiti-ri.

Ioane ro Iesu hiwo to giauri

⁹ Mo Ioane ie, mo nio naramu e, ina mo nio mutu Iesu sapuwo to atu se temeteme noti niauri-dumo. Nimo atu se Godi edi kiwaboi maumo ro nato koko se norowotoi. Mo ro Godi edi owera ro urubia na-nimowautiti, ibose Iesu mo ro simara idomari to na-niaurititi beda tanaro ro gisioidiro, nou sapuwo to nimowautiti, ina mo dibura to nou ri nedea-rimo Petimosi Ura ato.

¹⁰ Abera Naramu edi saiki ro nato mo Godi edi Urio ro nou ro aise noworohuti. Ina huru rido mo ro auna kodu nato nirorowai humuko diamo sosoro

¹¹ na-gutura-ro ibo, 'Oro ro beda tanaro ama-iauri-ri, buka ato aise ba-disioidiro. Ina 7 awawo sabowa ato mo urubia iato na-orowomidiro, nedi umoro owera ro neio aboto nou ba-dimerio. Nedi 7 sabowa ro neio ie Epesesi, Semena, Pegimu, Taiatira, Sadisi, Piradepia, Raodesia.'

¹² Mo iato a-niraroweauti owera kodu edi dubu aboudo gosuruo-ro, nou nosora. Mo edi tau ato nerewesegerai mo ro 7 gorodi erempa kiaremo nakomu se niwia, erempa mutu.

¹³ Neio turituri ato ata dubu se nowea, *Imese Urubia Kiauri Dubu nou sosoro nowea na-gotoi. Keakea tuturu obotama goroidiro sairo mabu ta-giwasomai. Nou ro ibose gorodi gagabe ta-garagodea nou goroidiro.*

¹⁴ *Nou eputa sobo mutu ipakea musuga sosoro ie imese keakea ia ie. Ibose nu idomari teibo imese era pina sosoro giriware-rido.*

¹⁵ *Nou sairo teibo sagaru durupi saiki korosa ro kimewia ato, idaibo sosoro gerememiouti-rido.*

Ibose nou owera kodu kadoro obo diamo sosoro geremohumo-ro.

¹⁶ Nou ro tumodi tu to 7 kiboni girobidiro. Nou matagoro rido sapuwosapuwu susura giri nou ro asumaidiro-titi. Nou sosoro woidomari bubu ro kowasiai tato saiki idaibo sosoro imese benenio ia se irememioutititi.

¹⁷ Nu sosoro edi tau ato nowea mo nou sairo mabu ato egenabo nirosiriti, sapuwu pamo imese norobu. Nou tumodi tu na-gotuturai, mo durupi ato aise gedea. Nou ro ibo, 'Oro tere na ie! *Keba moro ato ti-nitoititi, saro gabo ato ti-nitoititi-die*, imese namabu sirio mo ro ta-nimapogai, mo do ie.

¹⁸ Mo nouse ie keremiro mabu dubu. Mo kebase ta-naraburai, owera neito ma-dirorowai-ro mo womu tato womu tato keremiro dubu nouse ie. Pamo abato edi magere ki ro, ibose korowaburo urubia korowomidiro moro Dudi nou magere ki, mo ro tinorobidiro-ma.

¹⁹ Ina noudo ie oro ro dese to edi na iauri, ina abora etou tanaro ro ororosoidiro-dumo, ina ido etou tanaro ro amadimo-ororosoidiro-ri, neio se buka ato aise disioidiro.

²⁰ 7 kiboni oro ro na-iauri-die mo ro tumodi tu to na-nirobidiro, ibose 7 gorodi erempa kiaremo nakomu oro ro na-iauri-die, erempa mutu, maumo oro ro umoro oi tato, abora oro aboto maumo anama-iwapotai-ri. 7 kiboni neio Godi sowake urio iwapotaidiro-die, Iesu urubia 7 awawo sabowa ato na-orowomidiro neio iwarebidiro na ie. 7 gorodi erempa kiaremo nakomu, Iesu urubia iwapotaidiro-die, 7 awawo sabowa ato na-orowomidiro io neio ie.'

2

Muro ower a Epesesi sabowa kimibiria urubia aboto

¹ Abera Naramu ower a mo aboto ibo gutura-ro, ‘Mo edi sowake urio ro mo urubia Epesesi sabowa ato nou ro na-emeaurititi, ower a nou aboto ibo ba-demeiriai mo urubia sapuwo to. Muro ower a mo aboudo ibo ie, mo Iesu nouse ie, mo ro tumodi tu to 7 kiboni nirobidiro, ina 7 gorodi erempa kiaremo nakomu turituri ato nirohotiti.

² Mo auna umoro ie nio ro etou tanaro isioidirotiti-dumo, idaibo nio ro auna woko mo sapuwo to na-isioidirotiti-dumo. Ina mo auna umoro ie nio koko se ti-wotoititi-dumo. Mo umoro ie ibo nio ro ubauba tanaro kisioidiro urubia mutu kidabuti nio ubi tato ia ie. Nedi urubia ro bagea to ibo iarotiti-dumo, “Nimo Iesu ro kitiodorai urubia ie.” Kaupoti neio Iesu ro kitiodorai urubia pua. Nedi urubia ro neio kitamudiro ower a, tanaro kisioidiro mutu nio ro mea se ta-gimeiyoti-rimo. Neio nio ro ta-gieibimai-dumo ibo neio karasaubuti urubia ie.

³ Mo sapuwo to nio ro koko tau na-iaurititi-mo, nio koko se iwotoititi-mo. Pua ie mo nio ro aise nowasorotiti-mo.

⁴ Kaupoti nio ubauba tanaro kaupoti nou sapuwo to ubi tato nou ri noi. Nio kimibiria gabo to edi tau ato godoro-rimo, mo nio ro arua urubia mutu auna se nemaragoidirotiti-mo. Ina nio abora beda gorowati-dumo?

⁵ Ma-dimaragoidiro-mo! Nio abora iroruwo-die, nio kebase aupiaupi se

gorowomidiro mo abato, abora mo aboudo
damodamo oititi-dioumo! Ba-derewesegerai-mo
ina beda nirimagare tanaro na-gisioidiro-rimo
kebase, mo nio ro auna se
na-nemaragoidirotiti-mo, neio se ina
ba-disioidiro-mo. Nio korowameai tato keba
komidiro muro to, mo nio aboto
anamadi-ereredeai-ri, nio aboudo erempa
kiaremo nakomu anamadi-owatateai-ri, nio mo
ro anama-iburutai-ri.

⁶ Kaupoti mo nio ro kamade neito
nowai-dumo nio ro ata mea tanaro mo sosoro
gabo ato nou isioidiro-dumo. Nikorasi urubia
neio bagea karasaubuti kitamudiro urubia ie,
neio ro edi tanaro ro na-isioidiro-dumo, nio ro
auna se ihoio-dumo. Ibose neio ro edi tanaro ro
na-isioidiro-dumo, mo ro auna se nihoio.

⁷ Nio etio ra modobo ato kirowidiro Tarena
Urio beda owerai aro-die mo urubia aboto, nou
owera gare se ba-demedea-mo. Nio etio ra koko
se na-iwotoi-dumo, ubauba tanaro
na-iwameduti-dumo, nedi urubia ro mo ro
anama-imapoi-ri *keremiro kimio ota* iopu kiho
aboto, Godi edi mea ia moro ro nato na-owotoi.'

Muro owerai Semena sabowa kimibiria urubia aboto

⁸ Abera Naramu owerai mo aboto ibo
guturai-ro, 'Mo edi sowake urio ro mo urubia
Semena sabowa ato nou ro na-emeaurititi,
owerai mo aboto ibo ba-demeirai mo urubia
sapuwo to. Owerai mo ibo ie, Keba moro ato
ti-nitoititi, saro gabo ato ti-nitoititi, imese
namabu sirio mo ro ta-nimapogai, mo do ie.
Ibose mo ta-naraburai, ina ta-norowameai-ro
pamo rido, owerai mo aboudo ibo ie.

⁹ Mo umoro ie nio temeteme mo sapuwo to noti iauri-dumo, ibose namabu tato noto orowomidiro. Kaupoti Adiri sabowa ato nio wisa sirio tiamo-die. Nio beda oweru to iwaititi-dumo ubauba, mo umoro ie. Neio ibo iaro-dumo “Nimo Iu urubia ie”, kaupoti neio Iu urubia pua, neio Satani urubia ie.

¹⁰ Ubauba tau nio aboto aupise tou-die, nio nato tere oi ate. Nio mo ro a-nimowapotai nio kiwaibirio sapuwo to Satani ubi ato nio arua, dibura to amadimi-iaremo-ri. Nio mibo tuturu tau to iauri-ri pua. Iesu gabo ato koko se aise ba-dorowotoi, womu tato pamo kowea, ina nio mo ro womu tato womu tato keremiro nato nama-imio-ri.

¹¹ Nio etio ra modobo ato kirowidiro Tarena Urio beda oweru aro-die mo urubia aboto, nou oweru gare se ba-demedea-mo. Nio etio ra koko se na-iwotoi-dumo, ubauba tanaro na-iwameduti-dumo, edi tau ato arua urubia ina pamo namadimo-owea-ri, nio ro nedi ubauba ro owea-ri pua.’

Muro oweru Pegamu sabowa kimibiria urubia aboto

¹² Abera Naramu oweru mo aboto ibo gutura-ro, ‘Mo edi sowake urio ro mo urubia Pegamu sabowa ato nou ro na-emeaurititi, oweru nou aboto ibo ba-demeiriai mo urubia sapuwo to. Sapuwosapuwo giri susura mo abato towamo, mo aboudo oweru ibo ie.

¹³ Mo umoro ie nio edi moro ato irowomidirotiti, sirio urubia iato Satani ubi tanaro isioidirotiti-dumo. Kaupoti mo nio ro mea se nowasorotiti-dumo. Entipasi ro

morobise to mo sapuwo to sirio tau urubia nou ro imowautititi, ina nou iedi tau ato gopia-rimo nio sabowa ato, Satani ro na-iaurititi iedi sabowa ro, nio ro mo gabo emesera! pua, koko se aise giwotoi-rimo.

¹⁴ Kaupoti nio abato sipu tato ubauba tanaro nou nimowea, neibi sapuwo to ubi tato nou ri noi. Nio kimibiria urubia maumo ato, arua urubia Baramu edi ubauba tanaro ro nou obodoro-dumo. Io nedi dubu ro nou ro ata auna dubu masiro Baraki nou Isiraere urubia mutu boso aboto na-gou-rimo, neio nou ro Satani namusu to giwou. Ina noudo ie Isiraere urubia Baraki ro ubauba aise giwai. Neio nou ro ubauba gabo to giwaguwo, idaibo ohona orora sapuwo to na-gimamo-rimo nou giho-rimo, ibose upo tanaro iato gisioidiro-rimo. Baramu edi ubauba tanaro ro na-ibodorotiti-mo, nio abato arua urubia torowomidiro nou sosoro.

¹⁵ Ibose nio abato arua urubia torowomidiro, Nikorasi urubia edi kitamuidiro tanaro ro na-ibodoro-dumo.

¹⁶ Ina noudo ie ubauba aboudo aise derewesegerai-mo! Kerewesegerai tato, mo nio aboto aupise ie kou, boso anamadi-owou-ri neio aboto. Giri ro asumaidirotiti mo matagoro rido, boso nou mutu anamadi-owou-ri.

¹⁷ Nio etio ra modobo ato kirowidiro Tarena Urio beda oweri aro-die mo urubia aboto, nou oweri gare se ba-demedea-mo. Nio etio ra koko se na-iwotoi-dumo, ubauba tanaro na-iwameduti-dumo, ohona mana to na-giasoro-rimo piro se na-iamo, sapuwo nio paea se mo ro nato anama-imio-ri. Ibose nio mo ro erere se anama-imio-ri keakea nadi, nio *orio*

masiro nadi ato neio ro se ama-iateidiro-ri. Nio abato etio ro amadimi-imade-ri edi nadi ro, nio ia ro amadimo-oititi-ri orio masiro umoro, arua urubia umoro oi-ri pua.'

*Muro ower*a *Taiatira sabowa kimibiria urubia aboto*

¹⁸ Abera Naramu ower a mo aboto ibo gutura-ro, 'Mo edi sowake urio ro mo urubia Taiatira sabowa ato nou ro na-emeaurititi, ower a nou aboto ibo ba-demeiriai mo urubia sapuwo to. Ower a ibo ie, Godi edi mere ro mo nouse ie, nedi ower a ro mo aboudo ie. Mo idomari teibo imese era pina sosoro iriwaretiti-do. Ibose mo sairo teibo sagaru durupi saiki ro kimewia ato idaibo sosoro erememioutiti-do.

¹⁹ Mo auna umoro ie nio ro beda tanaro isioidiro-titi-dumo, ibose mo umoro ie nio natonato beda sosoro irimatiti-dumo. Mo umoro ie nio kimibiria mo sapuwo to beda ipi ato iamo. Mo ibose umoro ie urubia nio ro nirimagare maumo ato beda sosoro iwarebidirotiti-mo. Ina mo auna umoro ie nio koko se ti-wotoititi-dumo. Keba se nio ro mo ubi tanaro mea se ta-nemesioidiro-titi-mo, ina abora mea ia se ti-nemesioidiro-dumo.

²⁰ Kaupoti nio abato ubauba tanaro kaupoti nou sapuwo to mo ubi tato nou ri nato noi. Ata ubauba ia orobo Iesebere nio aboto na-gererede-a-ro, nu nio ro owagare pua, nio ro idomari to se giauri-rimo. Nedi orobo ro Godi ipusu ower a orobo to iratigititi, nu ubi neito owamotiti Godi sowake urubia nou ro kakate moro to iwamedei ri. Ina noudo ie neio ro upo

tanaro isioidiro-dumo, orora ohona
na-imamo-dumo iato iho-dumo.

²¹ Nedi orobo ro upo tanaro aboudo
kerewesegerai tau mo ro ta-nomia, kaupoti nu
ubi tato goi.

²² Nu mo ro temeteme mutu anama-eherai-ri
keta to imese ama-orobuti-ri. Ibose nu edi upo
tanaro ro etio ro isioidirotiti-dumo, nou ubauba
tanaro aboudo neio kerewesegerai tato, neio
ubauba ia temeteme mo ro anama-imio-ri.

²³ Nu edi kowasoro urubia ro
anama-owopiauti-ri. Erere sabowa ato mo
urubia ro namadimi-irowidiro-ri, neio umoro
nato amadimo-oi-ri ibo, *imese urubia niro turi,
kimaragoidiro patu, mo auna umoro ie, ina nio ro
beda tanaro isioidiro-dumo, nio erere se wisa nou
sapuwo to anama-imio-ri.*

²⁴ Ina nio arua mo urubia Taiatira sabowa ato
na-orowomidiro, nio aradabu tato iedi orobo ro
nou edi bagea kitamudiro tanaro ro nou aboto.
Ina ibose iedi tanaro ro amia urubia ro
na-imaragoidiro-dumo ibo neio Satani edi
maumo tanaro piro se na-iamo, iedi tanaro ro
nio ro umoro oi pua. Mo ro ata oweru
anama-utura-ri nio arua aboto.

²⁵ Nio ro kimibiria kebase edi na
gomidai-rimo, nouse ba-dorobidiro-mo, womu
tato mo korowameai. Ata tanaro ata nio
kosioidiro aboto, mo ro ohu rido imotomai-ri
pua.

²⁶⁻²⁸ Nio etio ra koko se na-iwotoi-dumo,
ubauba tanaro na-iwameduti-dumo, ina mo ubi
tanaro na-isioidiro-dumo womu tato mo
korowameai, nio aboto idiai kiboni mo ro
anama-apoi-ri, ibose imese urubia patu nio

aboto anama-iapoi-ri nio ro amadimi-iauri-ri.
 Abera ro edi pupuwo korosa ro mo aboto beda
 sosoro gaiwai-ro, ina mo ro nio aboto
 anama-aiwai-ri. Ina Tarena Buka idaibo sosoro
 ower aro-die, *Sirio duriomoro saiki ata nou ro*
eputa dubu edi auri gamini ro urubia sirio nou ro
neito koko muro to ama-iwaboi-ri. Kepuru
na-epeputi ina kerekere na-orowararioidiro-dumo
nou ro urubia idaibo mino to
ama-iwosuwoduti-ri.

²⁹ Nio etio ra modobo ato kirowidiro Tarena
 Urio beda ower aro-die mo urubia aboto, nou
 ower a gare se ba-demedea-mo.'

3

Muro ower a Sadisi sabowa kimibiria urubia aboto

¹ Abera Naramu ower a mo aboto ibo
 gutura-ro, 'Mo edi sowake urio ro mo urubia
 Sadisi sabowa ato nou ro na-emeaurititi, ower a
 nou aboto ibo ba-demeiriai mo urubia sapuwo
 to. Ower a ibo ie, Godi edi Tarena Urio 7 tanaro
 mutu mo abato tomidiro, ina 7 gorodi erempa
 kiaremo nakomu, erempa mutu, mo abato ibose
 tiamo. Ower a mo aboudo ibo ie. Mo auna umoro
 ie nio ro etou tanaro isioidirotiti-dumo. Urubia
 ro ibo imaragoidirotiti-dumo nio kimibiria
 teremiro-dumo, kaupoti nio pamo ro irobu.

² Diriribua-mo! Nio abato edi kimibiria
 kainakaina ro na-iamo, dimowoiriai-mo, aupise
 korodouti ido to neio araseperai-widumo. Mabu
 nio mo ro na-niauri mo ro edi tanaro ro
 na-niasouti, nio ro Godi sosoro gabo ato mea se
 iporeawado pua.

³ Ina noudo ie ba-dimaragoidiro-mo keba se nio ro beda kitamudiro gomidai-rimo, ina beda oweru girowidiro-rimo, edi kitamudiro ro durupi to aise disioidiro-mo, ina ubauba aboudo aise derewesegerai-mo. Nio kerewesegerai tato, mo piro dubu sosoro anamadi-ereredeai-ri, ina nio umoro oi-ri pua mo beda tau ato anamadi-orowameai-ri.

⁴ Kaupoti Sadisi sabowa ato arua urubia nio abato torowomidiro, neio obotama marea tato iroidiro-dumo, idaibo kerewae kerewae tanaro neio ro isioidiro-titi pua. Neio keakea obotama mutu mo abato ama-iateidiro-ri.

⁵ Nio etio ra koko se na-iwotoi-dumo, ubauba tanaro na-iwameduti-dumo, nedi urubia ro neio keakea obotama amadimi-irori-ri. Ata buka towamo, womu tato womu tato keremiro etio ro amadimi-imidai-ri, neio masiro iato tiamo. Nedi keremiro buka ro neido etio ra koko se na-iwotoi-dumo, neio masiro mo ro beda kiwagareawado pua. Mo ia ro Abera Godi nou sowake urio mutu neio sosoro gabo ato, nedi urubia ro anama-iasoro-ri mo morobise kowasoro urubia to.

⁶ Nio etio ra modobo ato kirowidiro Tarena Urio beda oweru aro-die mo urubia aboto, nou oweru gare se ba-demedea-mo.'

Muro oweru Piredepiu sabowa kimibiria urubia aboto

⁷ Abera Naramu oweru mo aboto ibo gutura-ro, 'Mo edi sowake urio ro mo urubia Piredepiu sabowa ato nou ro na-emeaurititi, oweru nou aboto ibo ba-demeiriai mo urubia sapuwo to. Oweru ibo ie, Mo tarena ia ie, ibose mo ro morobise oweru niarotiti. *Eputa dubu*

Deibidi abato edi ki ro kebase na-owamotiti, iedi atu ki ro abora mo abato owamotiti. Owera mo aboudo ibo ie. Nou ro beda magere kodobura ra, ata ro gabo tato ie kopai, ibose nou ro na-wopai, ata ro gabo tato ie kodobura.

⁸ Mo auna umoro ie nio ro etou tanaro isioidirotiti-dumo. Owera neito ma-dirowidiro-rimo, abora magere aise aidiro-die nio mo ro ta-nimodobura. Iedi magere ro ata ro kopai gabo tato ie. Mo umoro ie nio kimibiria pupuwopupuwo se iamo pua. Kaupoti mo edi kitamudiro ro mea se ibodorotiti-dumo, ina mo nio ro aratioutiti pua.

⁹ Neito ma-dirowidiro-rimo, arua urubia ibo iaro-dumo, “Nimo Iu urubia ie”, kaupoti neio karasaubuti urubia ie, Iu urubia pua, neio Satani urubia ie. Mo ro arua tanaro neio aboto anama-isioidiro-ri, ina noudo ie neio nio aboto amadimo-ou-ri, nio sairo mabu ato amadimi-iroboreauti-ri. Taie neio nato amadima-aro-ri ibo “Nio Iesu ro auna nirimagare timatiti-die.”

¹⁰ Nio mo ro keba se na-nimowapotai koko se orowotoi ri mo owera nio ro aise gibodoro-rimo. Ina noudo ie nedi auna ubauba tau ro na-wou-die nedi duriomoro gebari ro neito urubia iwaibirio ri, nio mo urubia ie, anama-iwairiai-ri.

¹¹ Mo aupise ie anamadi-orowameai-ri. Nio ro keba se edi kimibiria ro na-gomidai-rimo, nou se ba-dorobidiro-mo koko se, modobo pua nio edi mea wisa ro nou sapuwo to ata ro kiwasiri.

¹² Nio etio ra koko se na-iwotoi-dumo, ubauba tanaro na-iwameduti-dumo, nedi urubia ro neio mo ro Tarena Moto turi posi sosoro

anama-iwotoburio-ri Godi abato. Neio iato ibose to ama-irowotoititi-ri, ioudo beda keremeseruti pua. Ina neio abato oweru mo ro anama-iatiti-ri. Abera Godi nu edi masiro ro, ibose nu edi sabowa ro namadi-ororuwo-ri nou aboudo, masiro Orio Ierusalem, neio abato anama-iatiti-ri. Ibose mo orio masiro neio abato anama-iatiti-ri.

¹³ Nio etio ra modobo ato kirowidiro Tarena Urio beda oweru aro-die mo urubia aboto, nou oweru gare se ba-demedea-mo.'

Muro oweru Raodesia sabowa kimibiria urubia aboto

¹⁴ Abera Naramu oweru mo aboto ibo gutura-ro, 'Mo edi sowake urio ro mo urubia Raodesia sabowa ato nou ro na-emeaurititi, oweru nou aboto ibo ba-demeiriai mo urubia sapuwo to. Oweru ibo ie, edi masiro ro mo neito nararasorotiti "Nou Se ie". Ina ibose Godi mo ro mea se morobise to nowautiti. Ibose imese namabu sirio Godi ro mo tu to gisoidiro, oweru mo aboudo ibo ie.

¹⁵ Mo auna umoro ie nio ro etou tanaro isoidiroititi-dumo. Nio kimibiria egea mere se gebobo ta-goi-dumo. Nio aragare pua mo aboudo, ina ata sapuwo rido kiauri ato nio kimibiria korosa ia pua, egea mere se pupuwo tato ro irobowado, mo nio ro morobise to owasorotiti pua. Korosa kiworohuti modobo ia ie. Nio korosa ubi tato koi ato, gebobo ba-doi-mo. Korosa mere imese modobo ia pua!

¹⁶ Nio turi ato orowotoi, korosa ia pua, ibose gebobo ia pua ina noudo ie nio mo ro kibeimoi aboto ie idaibo nio imorowa rie.

¹⁷ Nio ibo na-iaro-dumo, “Nimo namabu sirio ie, modobo ato nirowomidirotiti, namabu nimo ro iosoratiti pua.” Kaupoti nio eremasibai pua ibo nio abato mibo sirio ia se tiamotiti. Nio imese nitonito ia se irowomidirotiti, arua urubia ro natonato imati-dumo. Nio modobo ato irowomidirotiti pua, nio namabu tato urubia ie. Ibose nio mea se irarowo pua, idomari pogo urubia ie. Nio mo sosoro gabo ato porose se sosoro irowomidirotiti. Kaupoti nio nakara se eremasibowado pua ibo nio idaibo sosoro mibo sirio mutu irowomidirotiti.

¹⁸ Ina nio mo ro muro owera nimia, agoago nadi masiro gorodi nou auna ia korosa era to kitai ato, nou auna wisa namabu to aise kararapoi ie. Morobise kimibiria idaibo sosoro ie, mo aboudo nou ba-dimade-mo, morobise namabu sirio urubia to ararasoro ri. Ibose nio mo aboudo keakea obotama ba-dimade-mo, nio iroidiro na ie. Nedi keakea obotama ro durupi neito namadimo-orowasio-ri, nio mo sosoro gabo ato siripo ro ina iwati ri pua. Ibose idomari meresini mo aboudo ba-dimade-mo, idomari mea se kirarowo sapuwo to.

¹⁹ *Mo edi urubia ro nirimagare na-nimatiti neio mo ro kimutuputiawado ie, neio ro ubauba beda tau ato iwaseidiro-dumo, neio mo ro ubauba wisa kemowame ie ubauba kimesere sapuwo to.* Ina noudo ie nio abato auna ubi ro ba-miamo mo ubi tanaro nou kisioidiro aboto, ina ubauba aboudo derewesegerai-rimo.

²⁰ Owera neito ma-dirowidiro-rimo, abora mo magere damo ato notoi ina nio aboto owera to ti-norowapotaiddiroiti nio ro magere emodobura

ri. Mo oweru kodu etu ro kemororowai ra ina magere kemodobura ato, mo nou aboto kodoro ie, ina mo nou mutu ohona atu se kiho ie.

²¹ Nio etio ra koko se na-iwotoi-dumo, ubauba tanaro na-iwameduti-dumo, mo ro neio anama-imapoi-ri mo mutu orowomidiro-ri, mo edi komidiro nakomu ro nato. Mo koko se beda sosoro nirimowotoi ina mo abera gomo ato nomidiro, nio idaibo sosoro to ama-irowomidiro-ri mo abato edi komidiro nakomu ro nato.

²² Nio etio ra modobo ato kirowidiro Tarena Urio beda oweru aro-die mo urubia aboto, nou oweru gare se ba-demedea-mo.'

4

Adiri sabowa ato Ioane ro gowea Godi komidiro nakomu

¹ Nedi tanaro sirio ro mo ro kiauri na-gororoporeai, mo toboro ohu to nato nawota. Ei! Mo sosoro gabo ato Adiri sabowa magere korodobura se nowea. Mo ro iedi atu kodu ro humuko diamo sosoro kebase ta-nirorowai, ina nato nirorowai ibo na-gutura-ro, 'Oro mo aboto neito dioro-ro, ido to beda tanaro ro amadimo-orosoiidiro-ri morobise to, oro mo ro nou anama-emasouti-ri.'

² Iedi tau ro nato, mo ina Tarena Urio ro noworohuti. Ina Adiri sabowa ato mo sosoro gabo ato eputa dubu komidiro nakomu nou se nowea. Ina iedi komidiro nakomu ro nato mo ro Godi se nowea na-gomidiro.

³ Nou karimakarima benenio nadi sosoro nowea. Nou edi komidiro nakomu ato

na-gomidiro darai ro ta-gemowagoberai, iedi darai ro auna gititi nadi sosoro ie.

⁴ Iedi komidiro nakomu ro turi ato gotoi ina arua 24 komidiro nakomu ro gemowaperai-rimo. Iedi 24 komidiro nakomu ro nato 24 eputa urubia neio ro gorowomidiro. Neio keakea obotama to neito ta-geremeduti-rimo ina gorodi hatu eputa urubia beda hatu iroidirotiti-dumo neio ro eputa ato nou se giroidiro-rimo.

⁵ Komidiro nakomu rido penenio se gerememiouti-rimo, ibose gururu ioudo aise geremohumo-rimo. 7 turupina neio ro giriware-rimo, nou komidiro nakomu sosoro gabo ato. Nedi 7 erempa pina ro neio ro Godi edi Tarena Urui ro 7 tanaro mutu nou e.

⁶ Ibose komidiro nakomu sosoro gabo ato, auna obo paruo garasi se sosoro ie nou ro gomidiro.

Iedi komidiro nakomu ro 4 keremiro nakomu neio ro aupise aiwidirotiti-bimo. Neibi idomari sirio mutu e, sosoro rido huru rido aise irarowotiti-dumo.

⁷ *Keba keremiro nakomu auna serawo tumu na masiro raioni nou sosoro ie, ata keremiro nakomu burumukau sosoro ie. Ina ata urubia dubu sosoro woidomari mutu e, ina ata auna banawario tamu to na-iarubiautiti nou sosoro ie.*

⁸ *Nedi keremiro nakomu ro neibi erere se 6 tamu mutu e. Ina neibi durupi ato, ibose tamu maumo ato, idomari sirio ie neio aise irarowotiti-dumo. Neio imese sirio tau wasare aise iwatiti-dumo, keremasio pua ibo, 'Imese pupuwo ia Abera Naramu Godi, nu tarena ie, tarena ia ie, imese tarena ia ie. Nu kebase ia se*

ta-imidirotiti, abora tomidiro, ina ido
ama-imidirotiti-ri.'

⁹ Nedi 4 keremiro nakomu peteibi ro Godi
emowabutiti-bimo, eso owera mutu. Nou ro
imidirotiti womu tato womu tato turi komidiro
nakomu ato. Neibi beda tau ato katamuai ra nou
kemowabu,

¹⁰ nedi 24 eputa urubia ro neio sopu to aise
kiroruo ie nou sosoro gabo ato. Taie etu ro
imidirotiti komidiro nakomu ato womu tato
womu tato keremiro to neio ro atu se iato
kemowabu e. Neio eputa rido eputa urubia
gorodi hatu neio ro aise kibedai ie nou sosoro
gabo ato, sopu ato aise kiedea ie. Taie nu iato
kemowabu e ibo,

¹¹ 'Nimo Abera Naramu Godi imese modobo ia
ie, nimo ro, imese urubia mutu, oro kemowabu
aboto, oro masiro nimo ro ohu ia to kowoubua
aboto, ibose oro pupuwo aboto nimo ro
kiroboreauti aboto. Mabu imese sirio nakomu
oro ro simara ubi ato gisioidiro, ina abora aise
noti iamotiti.'

5

Ioane ro giwia 7 kimakoko nakomu

¹ Iedi dubu ro na-gomidiro komidiro nakomu
ato, nou ro tumodi tu to peba ketebuti se
gorobidiro. Iedi peba ketebuti ro nato, goro ato,
ohu ato, titi se giāmo, ina 7 kimakoko nakomu
koko neito ta-gimowaititi, urubia ro titi kioputi
aboudo gabo iwasiai rie.

² Ibose mo ro nato nowea auna pupuwo
sowake urio, auna owera to nato gimowauti-ro
ibo, 'Ata dubu ata a-womidiro ra auna ia masiro

mutu, kimakoko nakomu nou ro kisebo ina peba ketebuti kemobodorai aboto?’

³ Kaupoti Adiri sabowa ato, nedi sopu duriomoro nato, Dudi sabowa ato ata dubu ata omidiro pua idaibo auna masiro mutu peba ketebuti nou ro kemobodorai aboto, ina titi egea mere se kimetai aboto.

⁴ Mo buro iato idobi se nedeia mabu ata auna masiro dubu ata omidiro pua peba ketebuti ato kimakoko nakomu kisebo aboto, ibose titi nou ro egea mere se kimetai aboto.

⁵ Iato tuturu to owamo pua mo ro 24 eputa urubia neio ata nou owera kodu se nemororowai mo aboto na-gutura-ro ibo, ‘Oro idobi na ie! Ma-dowea! *Auna serawo tumu na masiro raioni Iuda edi gu ro neido ie, ibose nou auna eputa dubu e Deibidi aboudo orobu-die.* Nou ro imese nasa urubia ta-giwamedei, nu keba se imese otoi. Nedi dubu ro nou aboudo modobo ie nedi kimakoko nakomu ro kisebo ina peba ketebuti kemabodorai aboto.’

Urubia sirio ro Iesu gemowabu-rimo nou sipisipi dawade sosoro ie

⁶ Mo ro sipisipi dawade se nowea. (Iesu sipisipi dawade to asorotiti-dumo.) Nedi sipisipi dawade ro kopia sosoro gotoi komidiro nakomu turituri ato. Nu ibose 4 keremiro nakomu peteibi ro ta-gemowaperai-birimo. Ina 24 eputa urubia ro ibose ta-gemowaperai-rimo. Nu 7 gaini mutu e, ibose 7 idomari mutu e. *Nedi 7 idomari ro neio Godi Urio ie. Nou Godi ro gemeirio imese duriomoro gabogabo to.*

⁷ Nedi sipisipi dawade ro ioudo na-gou-ro taie etu ro imidirotiti komidiro nakomu ato, nou

aboudo peba ketebuti iato gomidai-ro tumodi tu to edi na gorobidiro.

⁸ Nou ro edi tau ato gomidai-ro, 4 keremiro nakomu peteibi 24 eputa urubia mutu neio atu se goto to aise giroborea-rimo sipisipi dawade sosoro gabo ato. Neio ro imese sirio se gita sosoro nakomu masiro hapu erere se nou geremerebidiro-rimo. Ibose neio ro gorodi nuku erere se geremerebidiro-rimo iato a-giamo meamea nibo nakomu. Meamea nibo owapotaiddiro-die Iesu edi tarena urubia ro neio kararatoro oweria ie.

⁹ Neio atu se orio wasare iato giabodo-rimo, 'Auna masiro mutu dubu oro nou se ie peba ketebuti komidai aboto ina kimakoko nakomu kisebo aboto. Mabu oro ta-gopia-rimo, oro edi karima ro na-gisuputi urubia oro ro neito gimidai-ro, Godi urubia to nato gararapoi-rimo. Nedi urubia ro oro ro na-gimidai-ro neio erere gu urubia ie, erere oweria urubia ie, erere tanaro urubia ie, erere duriomoro urubia ie.

¹⁰ *Neio oro ro ta-giapoi Godi ro kiwabo maumo ato orowotoi ri, ibose nou imese sirio tau emowabu ri. Nedi urubia ro ido sopo duriomoro urubia amadimi-iauri-ri, eputa urubia to neio ro amadima-ararasoro-ri.'*

¹¹ Iato tuturu to pua mo ro auna ia wasare kodu nato nirorowai. Iedi kodu ro *imese sirio ia sowake urio aboudo ie, ota puara morobiritai-mo*, neio aboudo gosuruo-ro edi kodu ro. Iato iedi komidiro nakomu ro, 4 keremiro nakomu peteibi, ina 24 eputa urubia, neibi imese sirio sowake urio ro ta-gimowaperai-rimo.

¹² Neio ro wasare auna se nato giabodo-rimo

ibo, 'Nedi sipisipi dawade ro kebase edi na gopia-rimo, nou modobo ia ie urubia ro nou auna pupuwo korosa dubu to kasoro, ibose auna muro dubu to kasoro, ina auna pupuwo dubu to kasoro. Ibose beda mutu namabu sirio ra nou ro kirahidimai modobo ie. Nou ibose modobo ia ie imese sirio urubia ro nou masiro ohu to kowoubua, nou auna ia dubu to kasoro, ina nou auna se kemowabu.'

¹³ Tutura to pua mo ro ina nato nirorowai ata wasare diamo. Godi ro edi namabu sirio ro na-gisioidiro Adiri sabowa to, sopu duriomoro ato na-oroho-dumo, Dudi sabowa ato na-orowomidiro, ibose buru oromo ato na-oroho-dumo, ina beda mutu keremiro namabu ro oroho-dumo erere moro ato, urio sirio mutu, nedi wasare ro neio aboudo gou-ro. Neio atu se wasare iato giabodo-rimo ibo, 'Etu ro imidirotiti komidiro nakomu ato, ibose sipisipi dawade, neitiro se nimo ro kimowabu-ma modobo ie, neitiro masiro se kiwoubua-ma modobo ie. Neitiro nimo ro auna ia to kiasoro-ma modobo ie, ina auna pupuwo teibo to kiasoro-ma modobo ie, imese sirio tau womu tato womu tato.'

¹⁴ Iato iedi 4 keremiro nakomu peteibi ro, neibi ro atu se ibo, 'Ibose ba-mororosioidiro-mo!' Taie, iedi 24 eputa urubia ro neio goto to aise giroborea-rimo, Godi ra sipisipi dawade ra iato gimowabu-marimo.

6

Iesu ro 6 kimakoko nakomu na-gisebo-ibi

1-2 Mo neido na-nirarowea mo ro sipisipi dawade se nowea, keba kimakoko nakomu na-gesebea. Ina mo ro oweru kodu se nirorowai, iedi oweru kodu ro a-gou-ro 4 keremiro nakomu peteibi edi na ro imidirotiti-bimo Abera Naramu edi komidiro nakomu ro nou abato. Neibi ata ro gutura-ro iedi oweru kodu ro toboro gururu sosoro ibo, 'Neito dou-ro.' Iato mo na-nirarowea iau! Mo ro keakea hosi se nowea mo sosoro gabo ato. Iedi hosi ohu ro nato urubia dubu ro gomidiro. Iedi urubia dubu ro gari se gorobidiro. Ina nu Godi ubi ato eputa dubu hato nou gemamitiai-birimo. Taie imese gaimai boso aboto duriomoro urubia sirio iwameduti ri.

3-4 Keba kemakoko nakomu sipisipi dawade ro ta-gesebea, ina ata nou ro iato gesebea, mo ro ata oweru kodu nato nirorowai iedi 4 keremiro nakomu peteibi ro neibi ata aboudo, iato gutura-ro, 'Neito dou-ro!' Iau! Karima hosi se nowea era mio sosoro ie. Iedi hosi ro nato a-gomidiro urubia dubu giri gebari ta-gemowateai-rimo, nou pupuwo korosa Godi ubi ato gomia-rimo miro owagare ri imese duriomoro gebari aboudo, urubia ororopiauti ri.

5-6 Netewa teibo kimakoko nakomu teibo sipisipi dawade ro ta-gisebea-ma, ina ata nou ro iato gesebea, mo ro ata oweru kodu nato nirorowai iedi 4 keremiro nakomu peteibi ro neibi ata aboudo, iato gutura-ro, 'Neito dou-ro!' Mo na-nirarowea Iau! Mo ro a-nowea garegare hosi. Iedi garegare hosi ro nou ohu ato a-gomidiro ata dubu nou ro a-gorobidiro ohona kidoburio nakomu. Taie iato ata auna oweru kodu mo ro nato nirorowai. Iedi 4 keremiro

nakomu peteibi ro iedi kodu ro neibi edi moro
ato gomidiro-birimo kodu ioudo gou-ro.

'Duriomoro gebari ato ohona tato tau
ama-ererede-ri. Pupuwo korosa oro abato
towamo idaibo tanaro ororosioidiro rie. Urubia
abora ohona modobo ato na-imade-dumo, ido
neio ro idaibo imade-ri pua, kainakaina ohona
wisa imese ohu ia to amadimi-ioro-ri, urubia
auna sogoi ro ama-iwatiti-ri. Kaupoti oribi ota,
waini kumabo mutu ubauba iwai mamo. Oribi
iopu isi, waini iopu isi mutu, urubia abato aise
ba-miamotiti!'

⁷⁻⁸ Netewa didi kimakoko nakomu peteibi
sipisipi dawade ro ta-gisebea-ibi, ina ata nou ro
iato gesebea, mo ro ata oweru kodu nato
nirorowai iedi 4 keremiro nakomu peteibi ro
neibi ata aboudo, iato gutura-ro, 'Neito dou-ro!'
Mo na-nirarowea, iau! Mo ro a-nowea agoago
hosi, urubia durupi agoago beda sosoro koi ra
pamo ro na-emou-die. Iedi hosi nou ohu ato
Pamo ro a-gomidiro. Pamo na-gou, nu saro rido
Dudi ro gobodoro. Dudi ubi ie urubia sirio nou
ro iwoiriamuti ri nou aboto. Godi ro ibo gutura,
'Pamo ra Dudi ra, nitiro mo ro pupuwo korosa
nimia-ma, nedi duriomoro gebari ro netewa
netewa patu to kiasiuoti ato, ina kaupoti patu
nitiro ro kiopiauti to oporeai ri. Erere mino to
ba-diopiauti-do, *boso to, ohona tato to, temeteme
to, ina serawo namabu to.*'

⁹ Netewa netewa kimakoko nakomu peteibi
sipisipi dawade ro ta-gisebea-ibi, ina ata nou ro
iato gesebea. Nadi kitomuti patapata mabu ato
mo ro urio sirio nato niwia. Neio ro Godi oweru
koko se ta-irobidirotiti-mo, urubia nouto

ta-imowautiti-mo ina urubia ro nou mabu ato
giopiauti-rimo.

¹⁰⁻¹¹ Nedi urubia ro na-giopiauti-rimo auna
owera to nato gutura-rimo ibo, 'Auna ia eputa
dubu, tarena ia dubu ibose morobise ia dubu,
sopu duriomoro urubia neio oro ro beda tau ato
ama-iwai-ri koto, ina nimo kiopiauti wisa oro ro
beda tau ato ama-iwameai-ri?'

Nedi urubia ro neio erere se keakea tututu
sodo Godi ro gimio. Godi ro neio ibo
gimowapotai, 'Egea mere se
ba-deremasebidiro-mo, womu tato nio kimibiria
naminiramio mo sowake nio mutu
na-nemoworohutiti-mo, sopu duriomoro urubia
ro neio ro namadimi-iopiauti-ri. Nio beda sosoro
giopiauti-rimo mako nama-orobai-ri, taie wisa
neio ro amadimo-owea-ri koto abato.'

¹² Paibu kimakoko nakomu sipisipi dawade ro
ta-gisebea-ibi, mo ibose to nirarowo ina ata nou
ro iato gesebea. Tutura to owamo pua auna ia
sopu momuruwo nato goromuruwouti. Saiki
beneniobenenio kimeweti duwoduwo to aise
gararapoi, garegare obotama sosoro ie. Ina
sagana era mio karima beda sosoro ra ibo
girarowo-ro.

¹³ *Ina kiboni sirio toboro rido aise giretuti-ro
sopu duriomoro to, woimu iopu auna gawia ro
na-imowamuseti-die idaibo sosoro giretuti-ro
sopu duriomoro to.*

¹⁴ *Toboro kere turi ato aise gararapepea-rido
keta ketebuti beda sosoro ra sapuwosapuwo ibo
geretebuti-rido sapuwo womu rido sapuwo womu
to. Beda mutu podo sirio ro gorowotoi ina ura
na-giwadaudiro neio korowotoi moro rido ibose*

kiwadaudiro moro rido aise
garagareawado-rimo.

¹⁵ Awawo eputa urubia duriomoro edi na urubia ro iaurititi-dumo, awawo gabamani urubia, boso koroho awawo urubia, namabu sirio urubia, awawo masiro urubia, wisa tato woko urubia, ibose simara ubi woko kisioidiro urubia, nedi urubia sirio ro *neio tere ri agabea maumo to aise garateauti-rimo. Ibose neio arua nadi maumo to goropiro-rimo.*

¹⁶ *Nedi urubia ro neio nadi ra podo ra aboto aise gorowaro-rimo iwasio ri. Neio ro ibo, 'Nimo diwasio-rimo, nedi dubu ro omidiro eputa dubu komidiro nakomu ato nou aboudo diwasio-rimo! Ibose sipisipi dawade auna serawo ie nimo aboto, nou aboudo diwasio-rimo!*

¹⁷ *Mabu abora nou e auna serawo saiki noto owaroho, neitiro edi serawo ro nou aboudo, ata dubu ata ro keremiro ama-owea-ri ra?*

7

Godi edi isabuna ro 144,000 urubia sowake urio ro gimamo-rimo

¹ Nedi tanaro ro nou saro gabo ato mo ro netewa netewa sowake urio peteibi se niwia-ibi. Neibi kebase ta-goroburutai-birimo sie, nigori, surama, gawia, beda sapuwo rido iadudurotiti-dioumo, neibi ro aise girobai-birimo, duriomoro kihuduti aboudo iwasiai ri, duriomoro, buru oromo, ota kihuduti modobo pua.

² Godi ro neibi pupuwo korosa ta-gimiai-ibi, neibi ro duriomoro ra buru oromo ra ubauba iwai-ma ri.

Taie iato ata sowake urio mo ro nato nowea saiki kidiawado moro aboudo ioudo gioro-ro. Nou ro keremiro mabu dubu Godi, nou edi isabuna kimamo nakomu ro nou se gorobidiro-ro. Nedi sowake urio ro nou ro auna kaunene iato gutura-ro iedi netewa netewa sowake urio Peteibi ro Neibi aboto.

³ Nou ro ibo, 'Nibi ro duriomoro, buru oromo, ota, tau se ubauba iwai ate, womu tato neibi ro Godi edi sowake urubia ro *neio isabuna kimamo witoro ato, paease kiwapotai aboto ibo neio Godi do ie.*'

Taie, neibi ro Godi edi sowake urubia ro witoro ato isabuna iato gimamo-rimo.

⁴⁻⁸ Ina iato mo ro owerā ta-nirorowai isabuna beda mutu urubia ro gimade-rimo. Isiraere imese gu sirio aboudo 144,000 urubia isabuna neio witoro ato sowake urio Peteibi ro gimamo-birimo. Nu gu gabogabo neio ie: Iuda gu aboudo 12,000 ie, Rubeni gu aboudo 12,000 ie, Gadi gu aboudo 12,000 ie, Asere gu aboudo 12,000 ie, Napatari gu aboudo 12,000 ie, Manase gu aboudo 12,000 ie, Simioni gu aboudo 12,000 ie, Riwai gu aboudo 12,000 ie, Isaka gu aboudo 12,000 ie, Seburuni gu aboudo 12,000 ie, Iosepa gu aboudo 12,000 ie, ina Beniamini gu aboudo 12,000 ie.

Neio atu se kidabuai ato 144,000 urubia ie, Godi edi isabuna ro sowake urio aboudo neio ro gimade-rimo.

Abera Godi Iesu mutu auna ia dubu patu ro gimowabu-marimo

⁹ Nedi tanaro na-goroporeai-rimo nou saro gabo ato iau!, mo sosoro gabo ato auna ia dubu

patu ota puara mororobiritai-rimo idaibo sosoro ie, modobo pua kioputi imese sirio ia ie. Nedi urubia sirio ro erere duriomoro rido goroho-rimo, erere gu urubia ie, erere tanaro urubia ie, daro erere owera urubia ie. Neio eputa dubu komidiro nakomu nou sosoro gabo ato gorowotoi, ibose Sipisipi Dawade sosoro gabo ato gorowotoi. Nedi urubia ro keakea tututu sedo ta-giroiti-rimo, neio ro wakau girobidiro-rimo.

¹⁰ Neio ro auna ia kodu to ibo garo-rimo, 'Godi oro etu ro imidirotiti nedi komidiro nakomu ro nato, ibose Sipisipi Dawade na-imidirotiti, nitiro urubia simara ubauba aboudo nitiro ro kiapopo ie.'

¹¹ Iato iedi komidiro nakomu ro, 24 eputa urubia, ina 4 keremiro nakomu peteibi, neibi imese sirio sowake urio ro ta-gimowaperai-birimo. Iedi komidiro nakomu ro nou sosoro gabo ato, neio imese atu se eputa aise giwaposowa-rimo, taie Godi iato gemowabu-rimo.

¹² Neio ro ibo, 'Nou ibose ba-mororosioidiro-rimo! Oro modobo ia ie nimo ro auna se kemowabu, ina oro auna ia dubu to kasoro, ina auna muro dubu to kasoro. Oro modobo ia ie nimo ro eso owera karo oro aboto, ibose oro masiro ohu to kowoubua, oro auna pupuwo korosa dubu to kasoro, ina auna pupuwo dubu to kasoro. Imese sirio tau nimo ro nedi owera ro oro nouto memowabu-rimo womu tato womu tato. Ibose ba-mororosioidiro-mo!'

¹³ Taie iato 24 eputa urubia mo neibi ata ro

nemodowa-ro, 'Tedi urubia ro na-orowomidiro-die keakea obotama mutu, neio etio ra? Ina boido ra neio?'

¹⁴ Ina mo ro ibo, 'Auna dubu, oro umoro ie.'

Taie, nou ro ibo, 'Tedi urubia ro neio auna koko tau aboudo gou-dioumo, neio obotama Sipisipi Dawade edi karima ro garawiriti neio ro neito ta-giwiouti-rimo, keakea neito giwai-rimo.

¹⁵ Ina noudo ie iedi urubia ro neio Godi komidiro nakomu nou sosoro gabo ato nou ri irowotoititi. Neio ro nu duwo saiki sirio tau Godi ubi tanaro nou ri isioidirotiti-dumo nou edi Tarena Moto ro nato. Ibose etu ro imidirotiti komidiro nakomu ato neio nou ro asesepu maumo ito ama-iatopea-ri, iato ama-irowomidirotiti-ri.

¹⁶ *Neio ohona sogoi ro ina iwati-ri pua, obo sogoi ro ina iwati-ri pua, ina auna saiki korosa ro iauri-ri pua.*

¹⁷ Mabu sipisipi dawade edi na imidirotiti eputa dubu komidiro nakomu ato, *sipisipi kimowotoi dubu ro sipisipi beda sosoro kimowotoi ra, neio nou ro ibo ama-imowotoi-ri, ibose ama-iwaboidiro-ri keremiro kimio obo gabibiri aboto idio ri. Keba se neio edi mibo mutu na-irowomidirotiti, iedi mibo ro Godi ro ama-iwatateai-ri neio aboudo, ido mibo tato ama-irowomidirotiti-ri.'*

8

Iesu ro iana kimakoko nakomu gesebea

¹ Sipisipi Dawade ro iana kimakoko nakomu aise gesebea. Iedi kesebea ro na-gesebea, iedi

tau ro nato Adiri sabowa ato auna gasio aise gereredeade, ata diamo ata ororosioi diro pua.

² Iedi diamo tato tau ro egea mere se ta-gadomaidiro, taie mo ro nato niwia iedi 7 sowake urio ro Godi sosoro gabo ato na-irowotoititi. Neio humuko erere se nou ro iato gimio, neio se girobidiro-rimo.

³ Ina iato ata sowake urio ro gou-ro, nou ro a-gorobidiro-ro gorodi nuku meamea nibonibo nakomu beda moro ato iamotiti, nou imese gou-ro Godi komidiro nakomu sosoro gabo to, gorodi nadi kitomuti bato gowamo. Taie nedi sowake urio ro auna ia mea nibo nakomu Godi ubi ato gomia-rimo, nou ro nou giedea gorodi nadi kitomuti ohu ato, era iato ibose to giriware, taie nou ro iato aise gimusubua.

⁴ Iedi mea ia nibo ro ina Godi edi tarena urubia ro neio edi kararatoro owera ro, neitiro na-garadabuai-rido, neio ro gioro-rimo sowake urio aboudo Godi aboto.

⁵ Iedi atu sowake urio ro nadi kitomuti rido era nou ro ioudo na-gimade-ro, nou ro edi mea nibo nuku ro neito iato giaremo, taie iedi nuku ro nou ro sopo duriomoro to aise geherai-ro. Nou neito na-gorowateai sopo duriomoro to, iato penenio ro gerememiouti-rimo, gururu moromoro rido aise geremohumo-rimo, ibose auna sopo momuruwo aise gororosioi diro nedi duriomoro gebari ro nato.

Sowake urio ro humuko giourio-rimo

⁶ Taie iedi 7 sowake urio ro 7 humuko nato gimododiai-rimo iouria ri.

⁷ Keba sowake urio ro humuko nato guria, koko daroho nadi iopu sosoro, era karima mutu, na-geremadabuti-rimo, binio to aise giretuti-ro. Ina noudo ie sopu duriomoro netewa didi patu Peteibi to kiaeputi-bi ato, ata patu beda mutu ota ro gorowotoi iato, ibose beda mutu sugamuso ro gorowotoi goto ato, goto ia mutu, era ro imese aise gipisiamuti, ata nakomu ata emesera pua.

⁸ Kaupoti sowake urio ro humuko keba se ta-guria, iato ata sowake urio ro ata humuko nato guria-ro. Tutura to pua, auna ia podo sosoro era ro giriware, buru oromo to Godi ro nato geherai. Buru oromo netewa didi patu Peteibi to kiasiouiti-bi ato, ata patu edi obo ro gomidiro urubia karima to aise gararapoi.

⁹ Ina beda mutu keremiro nakomu ro goroho-rimo iedi oromo ipi ro nato neio imese aise gorowaburai-rimo, ibose beda mutu sawa pe ro goroho-rimo iedi oromo ipi ro nato neio imese giwarumia.

¹⁰ Netewa teibo sowake urio teibo humuko keba se ta-giouria-rido, ina iato ata sowake urio ro humuko nato guria-ro. Iato auna kiboni turupina sosoro toboro rido nato garaubai-ro, oromo sirio sapuwo nou ro aise girobai, obo gabibiri sirio mutu.

¹¹ Iedi kiboni ro geretei-ro neito nu masiro owamo ibo Miwahodo, nou ro beda oromo turi girobai, ibose beda gowo kainakaina girobai, neio obo imese karakara ia aise giwai. Urubia sirio ro na-gidio-rimo edi karakara obo ro, neio aise gorowaburo-rimo.

¹² Netewa didi humuko Peteibi Sowake urio Peteibi ro ta-giouria-birimo, ina ata Sowake urio ro ata humuko iato Guria. Saiki kimewia sapuwo kere benenio aise giaseperai, sagana ibose beneniobenenio kimewiti sapuwo kere aise giaseperai. Ibose kiboni sapuwo kere neio edi woroworo ro aise giaseperai-rimo. Ina noudo ie neio sapuwo kere duwoduwo ro aise girobai. Saiki tau sapuwo kere duwoduwo se gowamo. Duwo tau sapuwo kere woroworo ta-giaseperai, imese duwoduwo ia se gowamo.

¹³ Mo ina na-nirarowea giriai gebari se nowea ohu ato na-giarubiauti. Nou ro auna se iato giaia, ibo 'Tau o! Iau o! Auna mibo tau tou-die duriomoro urubia aboto! Mabu saro humuko Peteibi Sowake urio Peteibi ro beda tau ato namabimi-iourio-ri, awawo ubauba tanaro sirio ro amadimo-ororosioiido-ri.'

9

¹ Netewa netewa humuko ta-giouri-birimo, ina ata nato Guria ata Sowake urio ro, mo ro nato nowea ata kiboni toboro rido aise geretei sopu duriomoro to. Iedi kiboni ro auna ia bobo magere ki Godi ubi ato gomia-rimo.

² Nou ro edi auna ia bobo ro magere ki to na-godobura, auna era gahuta nou ro gioro-ro beda sosoro ra moto era ro kouho ato, idaibo sosoro gioro-ro bobo rido. Iedi garegare gahuta ro gioro-ro auna ia bobo rido, saiki ra toboro ra duwoduwo aise giwai-ma.

³ Iedi gahuta ro nou maumo rido pugo sirio aise giroruwo-ro sopu duriomoro to. Nedi pugo

sirio ro Godi ro pupuwo korosa aise gimia, gaburia beda sosoro ra urubia pugo ro iagege rie.

⁴ Neio Godi ro ta-gitomu ibo sugamoso, pari namabu, ota ubauba iwai mamu. Kaupoti Godi edi isabuna ro iateidiro tato neio witoro ato,

⁵ nedi urubia ro neio amadimi-iagege-ri. Nedi urubia ro pugo ro neio se amadimi-iagege-ri 5 sogomi to. Urubia ia pugo ro kiagege kawa amadimi-iagege-ri, neio aise orowaburo-ri pua, temeteme amadimi-iwaubere-ri. Gaburia ro kagegeai beda sosoro temeteme kowaibia ra, idaibo sosoro temeteme neio ro nou amadimi-iwaubere-ri.

⁶ Nedi tau ato namadimo-ororosioiido-ri, urubia ro korowaburo amadime-emaragoidiro-ri, kaupoti neio orowaburo-ri pua. Neio auna temeteme ro amadimi-iwaubere-ri, pamo neio aboudo ama-aratateawado-ri.

⁷ Pugo neio hosi sosoro goroho-rimo boso aboto urubia ro na-giwou-rimo. Neio ro eputa dubu gorodi hato beda sosoro ra, idaibo sosoro nakomu neio ro ta-giroiti-rimo. Neio sosoro woidomari urubia dubu sosoro ie.

⁸ Neio sobo daimo mutu e mamio sobo sosoro ie, neio ibonoro tututu ia ie, imese susura ia ie, auna serawo tumu na masiro raioni, neio ibonoro sosoro ie.

⁹ Neio edi hoko korowasiouti nakomu ro auri sosoro ie. Neio kiarubiauti edi tau ato gitamuai-rimo, iedi diamo ro nou auna diamo gebari ie. Nedi diamo ro hosi sirio boso aboto koroho woiri mutu nakomu saro rido kororomudo, idaibo sosoro diamo gebari ie. Ina

ibose, toboro gururu diamo sosoro
na-eremohumo-dumo neio boso aboto hio ito
na-orowararioidiro-dumo, nedi kiarubiauti
diamo idaibo sosoro ie.

¹⁰ Nedi pugo sirio ro urubia
amadimi-imataumo-ri gaburia beda sosoro
irimataumotiti-dumo. Pugo sirio neio pupuwo
korosa Godi ro ta-gimia 5 sogomi to urubia poro
to imataumo ri.

¹¹ Neio eputa dubu to edi na ro gararasoro, ata
ubauba sowake urio ie nou auna ia bobo rido
ioudo ta-gosuruwo-ro. Nedi ubauba sowake urio
ro Hiburu oweru to masiro Abodoni ina Giriki
urubia masiro to Aporiona, nedi masiro teibo ro
maumo ibo owamo 'Kisamodorowado Dubu'.

¹² Keba ubauba tanaro imese
gororoporeai-rimo, kaupoti netewa teibo
ubauba teibo tou-diedo.

¹³ Paibu humuko sowake urio ro
ta-giourio-rimo, ina ata sowake urio ro ata
humuko iato guria. Tuturu to owamo pua mo ro
oweru kodu nato nirorowai, gorodi patapata
gomogomo aboudo, Godi sosoro gabo ato edi na
ro itoititi.

¹⁴ Nou ro ibo gutura-ro humuko edi sowake
urio ro na-gorobidiro nou aboto, '4 sowake urio
Iupereitisi oromo bara ato na-imidirotiti-bimo
abora ba-dimahodai-biro.'

¹⁵ Iedi 4 sowake urio ro Godi ro neibi keba se
ta-gimododiai-bi, nedi saiki ro, sogomi, kisimisi
nou se ie nou emotoititi-bimo ubauba nato
ororosioidiro rie. Nedi 4 sowake urio ro nato
gimahodai-biro Iupereitisi oromo rido, urubia
netewa didi patu Peteibi to kiaeputi ato, ata
sapuwo kiopiauti to iporeai rie.

¹⁶ Mo ro nou nirorowai-ro urubia sipu mako na-gorobai 200,000,000 boso urubia, iedi 4 sowake urio peteibi ro neibi ubi ato neio sirio se hosi to boso aboto ou ri.

¹⁷ Mo ro hiwo korobu sosoro to niauri hosi, ina hosi kiwararioidiro urubia neio hoko korowasio namo ro imese karima ia ie, egea mere se toboro bubu sosoro ie, ibose imese agoago ia ie kakaba iopu kome sosoro ie. Hosi eputa na-giwou-rimo auna serawo tumu na masiro raioni neio eputa sosoro giwou-rimo. Neio matagoro rido era, gahuta mutu, ibose agoago ubauba nibo gahuta, neio ro gosuwoduti-rimo.

¹⁸ Nedi duriomoro gebari ro nato, netewa didi patu peteibi to kiapeputi-bi ato, hosi edi matagoro rido na-gosuwoduti-rimo, urubia sapuwo kere neio ro giopiauti-rimo.

¹⁹ Urubia kiopiauti aboto pupuwo korosa hosi matagoro ato giamo, ibose pupuwo korosa hosi wapomu ato giamo, mabu wapomu kaokao bagawe eputa sosoro ie urubia ubauba idaibo mino to giwai-rimo.

²⁰ Kaupoti arua urubia ta-geremeserai-rimo neio orowaburo pua, nedi ubauba ro na-gororosioidiro neio ro na-giauri-rimo, kaupoti neio nato ubauba aboudo erewesegerai pua, aise gisioidiro-rimo. Neio ro orora aise irorutiti-mo. Neio ro ibose gorodi to, siriba to, auri to, nadi to, ota to, asaso urubia ro tu to na-isioidirotiti-mo, neio ro aise irorutiti-mo. Nedi keremiro tato nakomu ro neio kirarowo pua, oweri kirowidiro pua, koroho pua.

²¹ Iedi ubauba tanaro hosi ro na-gisioidiro-rimo beda urubia ro

geremeserai-rimo, neio ro ubauba tanaro inaina aise isioidirotititi-mo, neio ro imeserai pua. Neio ro urubia aise iopiautititi-mo, ibose giwari aise isioidirotititi-mo, pakani aise iworohotititi-mo, upo tanaro aise isioidirotititi-mo, duboi namabu piro to aise imadetititi-mo, neio ro nedi ubauba tanaro sirio ro imesere pua.

10

Sowake urio ro peba ketebuti kainai Ioane ro gouho

¹ Mo ro ina ata auna pupuwo sowake urio nato nowea Adiri sabowa rido na-gororuwo-ro, nou tema obotama ta-gorori, eputa abato darai ta-gorowotowa, nou woidomari rido saiki woroworo beda sosoro ra ibo gimewia. Nou sairo teibo auna ia boroboro koko posi era mio sosoro giriware-rido,

² ina nou ro peba ketebuti kainai nou se gorobidiro, kodobura se gowamo. Nou tumodi sairo buru oromo ato gowotobowa, ina pere sairo goto ato gowotobowa.

³ Iato nou ro auna iamo gutura-ro, auna serawo tumu na masiro raioni, nou iamo sosoro gutura-ro. Nou edi tau ato na-gutura ibose 7 gururu owera ibose to geremohumo-rimo.

⁴ 7 toboro gururu owera edi tau ato na-garo-rimo, mo ubi ie iedi owera ro iatiti ri. Kaupoti mo ro owera kodu se nirorowai Adiri sabowa rido na-gutura-ro, 'Nedi owera ro na-irorowai, oro ro iatiti ate! Piro se ba-miamo!'

⁵ Iedi sowake urio ro mo ro edi na nowea sairo sapuwo buru oromo ato gowotoi, ina sapuwo

sairo goto ato gowotoi, taie *nu tumodi tu Adiri sabowa to aise gowotobowa.*

⁶⁻⁷ *Nou ro koko owera hodo asaubiai ri ibo gutura, 'Edi dubu na-imidirotiti womu tato womu tato keremiro to, toboro, sopo duriomoro, ibose buru oromo, imese beda mutu namabu patu ra, nou ro gisioidiro, mo ro nou masiro napoi nedi owera ro koko owai ri abora na-naro morobise owera ie. Iana humuko keba se uria-ri pua sowake urio ro, tauo keba se urubia umoro tato tanaro Godi ro na-giwapotai-ro nou ipusu owera urubia aboto nou sowake na-irohotiti-mo, nedi tanaro sirio ro paea se nato amadimo-ororosioiroidiro-ri. Tau tuturu to owamo-ri pua, aupise ie, amadimo-ororosioiroidiro-ri!'*

⁸ *Mo ro edi owera kodu ro keba se na-nirorowai Adiri sabowa rido na-gutura-ro, ina nato nirorowai. Nou ro ibo mo aboto, 'Iedi sowake urio ro, sapuwo sairo buru oromo ato na-owotoi, ina sapuwo sairo goto ato na-owotoi, nou aboto dou! Peba ketebuti kodobura nou ro na-orobidiro, domidai-ro!'*

⁹ *Taie mo edi sowake urio ro nou aboto aise nou, mo ro ibo, 'Iedi peba ketebuti ro mo aboto kaiwai modobo ra?'*

Taie nou ro ibo, 'Nou e, domidai! Ba-douho! Oro ro nama-ouho-ri, nu nogobe topo sosoro ie, ina niro turi to nama-ererede-ri, oro niro temeteme ro ama-orobai-ri.'

¹⁰ *Taie mo ro nou tu rido na-nomidai-ro, aise nouho, imese topo ia ie nogobe sosoro ie, kaupoti niro turi to na-gererede-rimo, mo niro temeteme ro aise norobai.*

¹¹ Taie mo neio ro iato nemowapotai-rimo,
'Erere tanaro urubia, erere duriomoro urubia,
erere oweru urubia, ibose eputa urubia neio
sapuwo to, Godi ipusu oweru ina ba-dimowauti!'

11

Woiginisi dubu teibo Iesu sapuwo to gimowautiti-do

¹ Mo modobo Abera Naramu aise nomia-ro,
taie nou ro nato nemowapotai-ro, 'Ba-dou,
Tarena Moto ba-dodoburio, nadi kitomuti
ba-dodoburio, ibose mo iato etio ro
nemowabu-dumo oro ro ba-dioputi!

² Kaupoti Iu oweru karo tato urubia neio beda
moro ato iradabutiti-dumo Tarena Moto abato,
iedi moro ro odoburio ate, ba-demeserai! Mabu
iedi moro ro neio ta-nimapoi. Nedi urubia ro
tarena sabowa Ierusarema 42 sogomi to neio ro
amadimi-itarumawado-ri.

³⁻⁶ Ina netewa teibo woiginisi dubu teibo mo
sapuwo to urubia na-imowautiti-do, neitiro mo
ro pupuwo korosa anama-imio-mari, neitiro ro
mo ipusu oweru 42 sogomi to urubia neito
amadi-imowautiti-ri, nou ibo owamo 1,260 saiki
to. Nedi dubu teibo ro garamu suana mutu
amadi-imowautiti-ri.'

Mo ipusu oweru dubu Sekaraia, urubia nou ro
ta-imowauti keba se *oribi ota teibo sapuwo to*,
ibose gorodi erempa kiaremo nakomu teibo
sapuwo to, *edi na itoititi-do sopu duriomoro edi
Abera Naramu ro nou sosoro gabo ato*. Neitiro ro
nedi urubia dubu teibo ro imabuti-madioudo.
Etio ubi ra neitiro ubauba kiwai-ma aboto,

neitiro matagoro rido era ro se kosuruwo ie, taie
iedi nasa urubia ro era ro aise kiho ie. Etio ra
ubi na-iamo neitiro ubauba kiwai-ma aboto, iedi
urubia ro morobise to aise korowaburai ie. Nedi
dubu teibo ro mo ipusu owerā
namadi-irowautiti-ri 42 sogomi to, neitiro abato
pupuwo korosa ama-owamotiti-ri daroho neitiro
ro aise amado-odiobutiti-ri. Ibose neitiro abato
pupuwo korosa towamo erere obo neitiro ro
urubia karima to aise amadi-iwaititi-ri. Neitiro
ibose pupuwo korosa mutu e, erere ubauba ia
tanaro urubia abato amadima-araratuamuti-ri
simara ubi tau ato.

⁷ Nedi dubu teibo ro Godi owerā korowauti
nama-oroporeai-ri, *ibisa auna ia bobo rido*
na-gioro-ro, iedi dubu teibo ro neitiro aboto boso
amadi-owou-ri. Neitiro nou ro
ama-iwamedei-mari, pamo se ama-iopia-mari.

⁸ Neitiro pamo durupi teibo auna gabo ato iato
aise ama-irobu-mari iedi auna sabowa ro nato.
Neitiro Abera Naramu ota kemowotowa teibo
ato iato keba se ta-gemopoguti-rimo. Iedi
sabowa ro piro masiro teibo mutu e, Sodom ra
Isipi ra.

⁹ Iedi sabowa ro nato erere tanaro urubia,
erere gu urubia, erere owerā urubia, erere
duriomoro urubia, nedi dubu teibo ro pamo
durupi teibo netewa didi saiki peteibi ina ata
saiki sapuwo, neitiro kiauri-ma to imese
amadimi-isoberai-mari. Neio ro kimoba-ma
aboudo sabi amadime-edea-ri.

¹⁰ Ina neio kamade ro ama-iwati-ri, namabu
aise amadimo-orumio-ri, mabu awawo
temeteme neitiro ro imiotiti-do abora pamo ie,
neio kamade nou ri amadimi-iworohuti-ri.

¹¹ Neio kamade giworohuti-rimo, kaupoti netewa didi saiki peteibi na-gororoporeai-birimo, ina ata saiki na-gowaroho, saiki turi ato nedi woiginisi dubu teibo ro neitiro *Godi ro keremiro huhuame nato gimia-ma. Taie neitiro pamo rido aise giribua-rido, imese gotoi-rido.* Neitiro edi urubia ro giauri-marimo neio auna tere ro giwati.

¹² Iato neitiro ro auna owera kodu nato girorowai-rido Adiri sabowa rido na-gutura-ro ibo, 'Nitiro neito dioro-rido!'

Taie neitiro Adiri sabowa to imese gioro-rido tema maumo ato, neitiro edi kioro ro na-gioro-rido, neitiro edi nasa urubia ro neio ro idomari to ibose to giauri-marimo.

¹³ Iedi atu tau ro nato auna ia sopu momuruo ubauba mino to nato goromurowai modobo pua, auna sabowa sapuwo kere ta-gamiriti. Iedi sopu momuruo ro nou ro 7,000 urubia nou giopia. Sopu momuruo ro edi urubia ro giaseperai, neio auna tere ro giwati. Taie neio ro Godi Adiri sabowa ato etu ro imidirotiti nou auna masiro dubu to gasoro-rimo.

¹⁴ Keba ubauba tanaro imese gororoporeai-rimo, ibose turi ubauba tanaro imese gororoporeai-rimo, kaupoti saro ubauba tanaro tou-die.

Sowake urio ro iana humuko guria

¹⁵ 6 sowake urio ro humuko ta-giourio-birimo iato ata sowake urio tau ro gowamo. Nou ro iana humuko nato guria. Taie, nou saro gabo ato Adiri sabowa ato mo ro auna owera kodu nato nirorowai ibo na-gutura-rimo, 'Nedi duriomoro

gebari ro Abera Naramu Godi nou edi kohodowa dubu ro nou mutu neitiro do to imese gararapoi. Nedi duriomoro gebari ro Godi ro ama-iaurititi-ri womu tato womu tato.'

¹⁶ Iedi 24 eputa urubia ro simara komidiro nakomu ato na-irowomidiro-titi Godi abato, neio sosoro woidomari sopo to aise giwaposowa-rimo. Taie Godi neio ro iato gemowabu-rimo

¹⁷ ibo, 'Imese pupuwo ia Abera Naramu Godi kebase na-imidiro-titi, ina abora na-omidiro, oro aboto eso owera niaro-dumo. Mabu urubia kiwaboi sapuwo to oro simara pupuwo korosa ta-giwapotaidiro-ro.

¹⁸ *Kimibiria tato urubia neio serawo ro iwatiti*, kaupoti oro edi serawo ro ta-gowapotai-die. Abora tau ta-gorobai-die korowaburo urubia neio oro ro koto ama-iwai-ri. Ibose tau ta-gorobai-die oro ro wisa kimio aboto. Oro ipusu owera urubia oro edi sowake ro na-iworohutiti-mo, ibose oro edi tarena urubia ro, ibose awawo masiro urubia dorogora urubia mutu oro masiro ohu to na-owoburiotiti-mo, neio imese oro ro wisa abora ama-imio-ri. Ibose tau ta-gorobai-die sopo duriomoro ubauba etio ro owaititi-dumo, neio oro ro ama-ipisiamuti-ri.'

¹⁹ Iato tuturu to owamo pua Godi edi Tarena Moto ro Adiri sabowa ato na-otoi-die, Godi ro magere aise godobura-ro. Iedi tarena moto goro ro nato Godi edi tarena bokose ro paea se imese gowamo-ro. Sopo duriomoro ato penenio ro se gerememiouti-rimo, gururu aupi ato kutura muso ato kutura. Sopo momuruwo ro sopo aise

gomuruwouti, ibose koko daroho nadi iopu
sosoro toboro rido binio to giretuti-ro.

12

Urubia orobo kanigiri mutu toboro ato gorowapotai-rido

¹ Toboro ato urubia umoro kiwai tanaro iato
gororosioidi-ro, urubia orobo ro saiki
na-gorori iato aise gorowapotai-ro. Sagana nou
ro sopu to giauri. Nou eputa ato, eputa orobo
hato ro gowamo, iedi hatu ro 12 kiboni ie.

² Nedi orobo ro nu mere niro mutu e, mere
oroto ri temeteme ro na-owaibiatiti auna iamo
nou iarotiti.

³ Tutura to pua urubia umoro kiwai tanaro
ata, toboro ato iato gororosioidi-ro. Auna ia
karima kanigiri nu 7 eputa mutu e eputa dubu
hato se giroidi-ro. 10 gaini nou 7 eputa rido
neio ro gorowotoi.

⁴ Kanigiri ro toboro rido kiboni netewa didi
*patu to kiapeputi-bi ato, ata patu woipi to aise
gitabitai-ro taie iato aise giherai-ro nedi sopu
duriomoro ro neito.* Taie kanigiri iedi orobo ro
nou sosoro gabo ato aise gotobowa. Nu ubi neito
gowamo mere kainai nou sosoro gabo ato mamu
ro oroto ri taie nato aise omodia rie.

⁵ Taie iedi orobo ro nou ro dubu mere se
*goroto, sirio duriomoro saiki ata nou ro eputa
dubu edi auri gamini ro urubia sirio nou ro neito
koko muro to ama-iwabo-ri.* Kaupoti iedi mere
ro mamu aboudo Godi ro aise gasioidi-ro taie
imese gowioro, nou ia komidi-ro moro ato iato
aise gowomi.

⁶ Taie nedi orobo ro nu beda duriomoro gemododiai goto se duriomoro nu ito aise godau, iato imidiro titi *1,260 saiki* to. Nu Godi ro iato mea se iaurititi.

⁷ Ina iato Adiri sabowa to auna ia boso nato gereredea. Godi edi sowake urio ro auna to edi na ro ararasorotiti Maikoro nu simara sowake urio sirio na-gidabuti, taie iedi auna kanigiri ro neio ro nato gemeiriai-rimo kado. Kanigiri ibose nu simara sowake urio sirio ta-gidabuti, nu ubi ie wisa owameai ri.

⁸ Kaupoti nou pupuwo modobo pua. Maikoro nu simara sowake urio sirio mutu kanigiri neio ro imese sopu to ta-gowororuwo-rimo. Taie kanigiri nu simara sowake urio mutu Godi ro sabi aise gimedea neio ina Adiri sabowa ato korowomidiro modobo pua.

⁹ Taie iedi auna kanigiri gebari ro Adiri sabowa rido Godi ubi ato aise geherai-rimo nedi sopu duriomoro ro neito. Kanigiri nu kebase bagawe to gorodobo nou ubauba orora nouse ie masiro Satani. Urubia sirio edi na ro isaubutiti, nou simara sowake urio sirio mutu, neio giherai-rimo nedi sopu duriomoro ro neito.

¹⁰ Iato tuturu to owamo pua Adiri sabowa rido mo ro auna kaunene nato nirorowai na-gutura-ro, 'Nimo Godi ro ta-gowapotai-die pupuwo korosa urubia ubauba aboudo kiapopo aboto, ibose nou edi kiwaboi tanaro ro ta-gorowateai-die. Ina pupuwo korosa Godi edi kohodowa dubu ro nou aboudo paease ta-gorowapotai-die. Mabu nimo kimibiria borubi sapuwo to kararasoro owera duwo saiki edina dubu ro iarotiti Godi sosoro gabo ato, nu

abora neito ta-geherai-dioumo nedi sopu duriomoro ro neito.

¹¹ Sipisipi dawade na-garaburai, kanigiri nimo kimibiria borubi ro neito aise geteamoidiro-rimo. Ibose neio ro woiginisi owera Iesu sapuwo to na-obodoroutiti-mo, neio ro kanigiri neito gowororuwoidiro-rimo. Nedi urubia ro simara keremiro eremaragoidirotiti pua, korowaburo aboto tere eremati pua.

¹² Ina noudo ie Adiri sabowa oro kamade diworohuti ibose oro abato etio ro orowomidiro neio mutu kamade atu se diworohuti-mo! Kaupoti nirimagare ie duriomoro ra buru oromo ra nitiro aboto, auna ubauba tanaro sirio nitiro aboto amadimo-ororosoidiro-ri. Mabu Satani nitiro aboto ta-gororuo-die. Nu umoro ta-goi ibo nu tau komukere ro ta-gorobai-die, nou simara ubauba ubi tanaro kisioidiro aboto, ina noudo ie nu abora auna ia serawo ro owati.'

¹³ Kanigiri sopu duriomoro to tau keherai ie, taie edi agimari orobo ro nou ro serawo ri aise gaipirio-ro opia ri.

¹⁴ Kaupoti nedi orobo ro auna banawario edi tamu teibo ro nou gemadebo-rimo, nouto odau ri. Nu Godi ro iedi duriomoro ro gemapoi goto se duriomoro neito aise godau, iato imidirotiti ina nu Godi ro iato mea mino to iaurititi. Nu iato netewa didi kisimisi 6 sogomi neito imidirotiti, nu kanigiri aboudo godau.

¹⁵ Nu kanigiri ro iato egea se na-otorutiti, taie obo nou matagoro rido nato garapusia-ro kadoidiro obo sosoro gou-ro, edi orobo ro karumo aboto.

¹⁶ Kaupoti edi orobo ro goto ro gowairiai na-garapepea, taie obo goto ro aise godio.

¹⁷ Kanigiri auna ia serawo goi iedi orobo ro nou aboto. Taie nou aise gaimai bosu owou ri nou edi merebusere sirio ro neio aboto. Godi edi sabi ro etio ro ibodoro-dumo, ibose Iesu edi owera ro koko se na-iroidiro-dumo, orobo edi merebusere ro, io neio ie.

¹⁸ Taie kanigiri buru oromo bara ato imese gotoi.

13

Ibisa buru oromo rido giro-ro

¹ Mo neido na-nirarowea, mo ro *ibisa se nowea buru oromo rido na-geribua-ro*. Nou 10 gaini mutu e, 7 eputa, ina 10 eputa urubia hatu idaibo sosoro na-iroidiritotiti-dumo nou giroidiro-rimu gaini ato. Eputa ato Godi masiro ubauba kowaititi sapuwo to masiro iatu giamo.

² Nedi ibisa ro *serawo namabu repadi*, nou sosoro ie. Nou sairo pata medube imese tututu ia ie musuga musuga. Ibose nou matagoro gebari ia ie, ibonoro imese susura ia ie. Iedi kanigiri ro nou ro ibisa simara pupuwo korosa iatu gomia ibo nu modobo ie erere tanaro kisioidiro, ibose nou ro iatu gomia simara komidiro nakomu urubia nou ro ioudo iauri ri. Ibose nou ro auna masiro gemapoi urubia simara mino to iauri ri.

³ Nedi ibisa ro nu ata eputa kikoni poro mutu e, nu idaibo sosoro keba se pamo ta-gowea, kaupoti nou meana ta-goi. Iedi ibisa ro imese urubia sirio ro eputa poro na-gemowea-rimu,

neio auna kimaragoidiro ro giopiauti, taie neio ro nou ubi tanaro aise gisioidiro-rimo.

⁴ Ibose kanigiri neio ro aise emowabutiti-mo, mabu ibisa pupuwo korosa nou ro gomia. Iedi ibisa ro neio ro ibose ta-emowabutiti-mo. Neio ro ibo iaro-mo ibisa sapuwo to, 'Ata nou sosoro omidiro pua! Ata dubu ata modobo pua nou mutu keremotobowa, nu gebari pere ie!'

⁵ Ina Godi ro 42 sogomi ibisa aboto nou giadodorai *nu nakara se auna se eremowabu ri*, ibose Godi masiro ubauba kowaititi aboto.

⁶ Taie ibisa ro ubauba owera karo nato gatamuai, io Godi masiro ubauba nato owaititi, ina Godi sapuwo to nou ro arua ubauba owera iarotiti. Ina Adiri sabowa sapuwo to, ibose Adiri sabowa ato etio ro orowomidiro neio sapuwo to ubauba owera nato iarotiti.

⁷ *Ina gabo ta-gorodobura-ro ibisa ro boso owou ri Godi edi tarena urubia ro neio aboto, ibose neio nou ro sopu to iwororuwoidiro ri.* Ibose gabo ta-gorodobura-ro ibisa ro erere gu urubia, erere tanaro urubia, erere owera urubia, erere duriomoro urubia, neio nou ro simara ubi to iworohuti ri.

⁸ Imese beda mutu urubia ro orowomidiro nedi duriomoro gebari ro nato, ibisa neio ro amadime-emowabu-ri. Ata buka ato womu tato womu tato keremiro etio ro amadimo-owea-ri, neio masiro iato tiamo. Kaupoti iedi urubia sirio ro ibisa neio ro namadime-emowabu-ri, neio masiro iato iamo pua. Nedi buka ro sipisipi dawade buka ie, edi na gopia-rimo. Duriomoro ido to gosioidiro, Godi ro keba se arua urubia nedi buka ro nato masiro ta-gisioidiro iato ibose

to iamotiti.

⁹ Etio ra gare mutu, ower a gare mea se
ba-memedea-mo!

¹⁰ *Etio ra Godi ro kebase na-gihodowa dibura to
iaremo ri, neio dibura to amadimi-iaremo-ri. Etio
ra Godi ro kebase na-gihodowa arua urubia ro
giri to iopiauti ri, neio giri to amadimi-iopiauti-ri.*

Ina nou mabu ato ie, koko tau idaibo
amadimi-iauri-ri Godi edi tarena urubia ro, ina
neio modobo ie koko se korowotoi, ibose neio
kimibiria modobo ie koko se kirobidiro.

Ata ibisa goto maumo rido gioro-ro

¹¹ Mo ro ina nato nowea ata ibisa goto maumo
rido na-gioro-ro, nou netewa teibo gaini teibo
mutu e sipisipi dawade gaini teibo sosoro ie.
Kaupoti nu ower a na-iarotiti, kanigiri ower a
kodu sosoro iarotiti.

¹² Nedi goto ibisa ro oromo ibisa ro pupuwo
korosa nato gomia, nou ubi tanaro kemesioidiro
aboto. Imese urubia sirio nedi sopu duriomoro
ro nato na-orowomidiro goto ibisa ro aise
gimagege, oromo ibisa emowabu ri. Iedi oromo
ibisa ro edi kikoni poro ro pamo na-gowea,
meana ta-goi.

¹³ Nedi goto ibisa ro nou ro erere awawo
pupuwo korosa tanaro nato gisioidiro. Idaibo
nou ubi ato era toboro rido aise giretuti-ro
urubia sosoro gabo ato nedi sopu duriomoro ro
neito.

¹⁴ Nu pupuwo korosa oromo ibisa ro ta-gomia,
ina pupuwo korosa tanaro nouto gisioidiro. Ina
noudo ie iedi urubia sirio ro nedi sopu
duriomoro gebari ro nato na-orowomidiro, nedi

pupuwo korosa tanaro ro na-giauri-rimo, neio nou ro neito gisaubuti. Goto ibisa ro nedi tanaro ro na-gisioidiro, oromo ibisa masiro idaibo auna neito gowaititi. Ibose goto ibisa ro urubia sirio aise gimutura ota titi oromo ibisa sosoro osioidiro ri. Iedi oromo ibisa ro kebase giri to gaudurai-rimo eputa ato, pamo sosoro ikoni poro mutu e, kaupoti araburai pua.

¹⁵ Ina gabo ta-gorodobura-ro goto ibisa ro pupuwo korosa komidai aboto, ina noudo ie oromo ibisa edi ota titi ro goto ibisa ro keremiro huhuame nato gemohudurai, nu oweru karo sapuwo to. Ina ota titi ro urubia sirio aise gimagege nou emowabu ri. Nou ro ibo, 'Mo ia nio ro ba-demowabu-rimo. *Nio abato na-orowomidiro mo kemowabu tato, mo oweru ato nio arua urubia ro amadimi-iopiauti-ri.*'

¹⁶ Goto ibisa ro imese urubia sirio aise gimagege neio tumodi tu ato o witoro ato isabuna imamo ri. Awawo masiro urubia, masiro tato urubia, namabu sirio urubia, namabu tato urubia, wisa tato woko urubia, ina urubia simara woko na-isioidiro-dumo, neio imese goto ibisa ro gimagege iedi isabuna ro imamo ri neio tumodi tu ato o witoro ato.

¹⁷ Beda urubia ra isabuna tu ato o witoro ato kemedea tato, nedi urubia ro neio aboudo gabo tato ie namabu mani to kimade ina keremahudirio. Iedi isabuna ro ibo owamo ibisa edi masiro ro nou se ie, nou masiro edi namba ro nou mutu.

¹⁸ Etio ra mea muro mutu, neio ro maumo mea se ba-miosora-mo keba ibisa edi namba ro, nedi namba ro urubia dubu namba ie. Ina iedi namba ro owamo ibo 666.

14

Sipisipi dawade 144,000 kimibiria urubia mutu e

¹ Mo iato na-nirarowea, iau! Mo ro Sipisipi Dawade se nowea Saioni podo ato na-gotoi-ro 144,000 kimibiria urubia mutu. Saioni podo Ierusarema sabowa ato itoititi. Ina Sipisipi Dawade nu edi Abera masiro ro, ibose nu ia edi masiro ro Iesu, neio witoro ato edi masiro teibo ro neitiro ro se gi-ateidiro-ma.

² Ina iato tuturu to owamo pua Adiri sabowa rido auna diamo nato nirorowai kadoro obo diamo sosoro, toboro gururu sosoro geremohumo-ro. Iedi diamo ro geremohumo-ro gita sosoro kiado namo hapu sirio neio diamo sosoro geremohumo-rimo.

³ 144,000 urubia orio wasare nato giabodo-rimo neio Godi komidiro nakomu sosoro gabo ato gorowotoi, ibose neio 4 keremiro nakomu Peteibi, 24 eputa urubia mutu neio sosoro gabo ato gorowotoi. Kaupoti nedi 144,000 urubia ro nedi orio wasare ro neio ia ro se goi-rimo umoro ina nou giabodo-rimo, arua urubia ro modobo pua umoro koi. Nedi urubia ro neio Godi ro auna wisa to giapopo-ro duriomoro rido.

⁴ Nedi urubia ro gorowotoi neio ata ubauba tato ie, arua mamio mutu upo tanaro isioidirotiti pua, neio irimo busere sosoro ie. Neio aboto Sipisipi Dawade ro beda owera karo ra aise ibodorotiti-mo. Nedi urubia ro neio duriomoro urubia aboudo auna wisa to ta-giapopo-ro. *Omona kiasesuti pari namabu Godi aboto urubia*

ro na-iaiwo-dumo, nedi urubia ro idaibo sosoro ie, Godi sapuwo to ibose Sipisipi Dawade sapuwo to.

⁵ *Nedi urubia ro neio ipusu rido karasaubuti oweru isuwodutiti pua, neio ata ubauba tato ie.*

Umoro oweru sowake urio peteibi aboudo ie

⁶ Mo iato na-nirarowea mo ro Godi sowake urio se nowea toboro ato na-godau-ro. Nou ro Iesu edi womu tato mea oweru ro nou gowou-ro urubia imowauti ri nedi soku duriomoro ro neito. Nedi mea oweru ro nou ro erere duriomoro to giworohuti, idaibo erere gu urubia aboto, erere oweru urubia aboto, erere tanaro urubia aboto giwauti.

⁷ Nou ro urubia auna oweru to ibo gimowauti, 'Godi masiro auna ba-dowaititi-mo, nu nio ro auna se ba-demaragoidiroiti-mo. Mabu tau ta-gosiomai-die urubia kimeiouiti aboto. *Adiri sabowa, soku duriomoro, buru oromo, obo sosu imese namabu mutu nou ia ro gisioidiro.* Ina noudo ie nou nio ro imese sirio tau aise kemowabu modobo ie.'

⁸ Keba sowake urio ta-gou-ro ina ata sowake urio iato gou-ro oweru mutu, 'Auna sabowa *Babironi ta-werešebuti Babironi sabowa ararasoro-ri pua, imese ta-waratowouti!* Kibase sirio duriomoro urubia nou ro ubauba ta-iwaititi nou edi ubauba durupi ubi tanaro ro neito. *Urubia dubu ro boinana dubu tuba auna se na-omio, ina nou ubauba neito na-owaititi, Babironi sabowa ro urubia sirio ubauba ibo iwaititi.*

⁹ Netewa teibo sowake urio teibo neitiro saro gabo ato, ina ata sowake urio tau ro gowamo taie, nou ro auna oweru to nato gutura-ro ibo,

‘Beda urubia ro imowabu-madumo ibisa ota titi mutu, ibose ibisa edi isabuna ro etio witoro ato giwate-rimo, o tu ato,

¹⁰ nedi urubia ro Godi ro karakara waini obo neio aboto kainai se imio-ri pua idio ri. Nedi karakara waini obo ro owamo ibo Godi edi auna serawo ro nouse ie, ata nakomu ata pоторо ie nou pupuwo tato kowai aboto. Ina nou mabu ato ie nedi urubia ro neio temeteme iamo aise amadimi-imarotiti-ri. *Neio era mio daroho iopu sosoro ubauba nibo mutu iedi tau ato nama-iho-ri tarena sowake urio sirio Sipisipi Dawade mutu neio sosoro gabo ato ama-ikakauhuti-ri.*

¹¹ *Neio edi era mio ro nama-ihotiti-ri womu tato gahuta aise ama-imaubotiti-ri.* Ibose ibisa nu ota titi mutu edi urubia ro gemowabu-rimo, o nou edi masiro ro etio durupi ato giateidiro, neio ata sipere tato ie, duwo saiki temeteme iamo aise amadimi-imarotiti-ri.’

¹² Godi edi tarena urubia ro nou edi sabi ro na-ibodoro-dumo, ina Iesu sapuwo to kimibiria koko se na-irobidiro-dumo, neio modobo ie korowotoi keremasebidiro mutu, korodiobo tato.

¹³ Taie ina mo ro ata owera nato nirorowai Adiri sabowa rido na-gutura-ro, ‘Nedi owera ro mo ro nama-aro-ri buka ato aise ba-disioidiro, nedi tau ro neido etio ra kimibiria na-iworohuti-dumo Abera Naramu sapuwo to, ina namadimo-orowaburo-ri, neio Godi ro meana kimio ie.’

Tarena Urio owera ibo aro-die nedi urubia ro neio aboto, ‘Io morobise ie, awawo woko na-isioidirotiti-dumo Iesu sapuwo to, imese amadimo-oroporeai-ri. Ina neio tu kawakawa ou-ri pua. Nedi meamea tanaro

na-gisioidiro-rimo neio mutu amadidimo-ou-ri
wisa imade ri.'

*Duriomoro urubia kaupoti moro to
ama-iwoiriamuti-ri*

¹⁴ Mo ina toboru ohu to iato nirarowea mo
sosoro gabo ato, ei toboru kere se nowea. Ina *edi
keakea toboru kere ro nato Imese Urubia Kiauri
Dubu nou se nowea na-gomidiro eputa dubu
gorodi hatu ta-gorori, pari ohona kiasio susura
giri se gorobidiro-ro.*

¹⁵ Taie iato tuturu to owamo pua ata sowake
urio Tarena Moto rido na-gosuruwo-ro Adiri
sabowa ato na-itoititi. Nou ro gomidiro tema
ato, oweru nou aboto ibo gutura-ro, '*Nedi susura
giri ro neito pari ohona ba-diasio ina ba-didabuti
mabu duriomoro ato pari ohona gumuni
ta-goi-dumo, kiwoiriamuti tau ta-gorobai-die.*'

¹⁶ Edi dubu ro mo ro na-nowea tema ohu ato
na-gomidiro nou duriomoro to na-giroborea,
susura giri nato gaudomowado, gumuni se edi
na ro gorowotoi nou ro aise giwoiti-ro.

¹⁷ Taie ina iato ata sowake urio Tarena Moto
Adiri sabowa ato na-gotoi ioudo nato gosuruo-ro,
nu ibose susura kabi se gorobidiro-ro.

¹⁸ Ibose ata sowake urio era korosa edi na ro
iaurititi, dao kimatowo patapata ato, nu iato
gosuruo-ro auna oweru to iato gutura-ro kabi
edi na ro gorobidiro nou aboto, '*Dokou kototo
tau ta-gorobai, ina dokou aboto ba-dedei.*'

¹⁹⁻²⁰ Taie edi sowake urio ro nu kabi nato
gewedei nedi duriomoro gebari ro nato, imese
dokou aise giebuti, ina aise gituti. Dokou dao ro
urubia iwapotaidiro-die. Iedi kituti moro ro

Godi niro pupuwo korosa kowapotai moro ie. Nou sabowa gomo ato owamotiti, sairo to kituti ato isi goro rido isuwoduti-dumo. Dokou na-gituti-rimo isi na-gisuruo-rimo urubia karima ie ina iedi karima paruo obo ro aise gorobodorouti. Iedi karima obo ro oromo sosoro gororosioidiro, karima obo paruo nato gohau-ro kituti moro rido, kodobowa ato 300 kiromita ibo ie. Nu ohu to kioro mako ibo ie, urubia dubu bena mako kowasomai ie, karima womu nato gopuwoidiro.

15

Ioane ro 7 sowake urio giwia kimibiria urubia mutu

¹ Mo ro ina ata auna ia tanaro urubia umoro koi sapuwo to Adiri sabowa ato nato nowea. Mo ro 7 sowake urio se niwia neio ro 7 iana ubauba kororosioidiro namabu nou girobidiro-rimo. Nedi 7 ubauba ro namadimo-ororosioidiro-ri imese iana ia ubauba ro amadimo-ororosioidiro-ri, Godi niro pupuwo nato aise ama-oporeai-ri.

² Taie ina mo ro ata nakomu nato nowea buru oromo obo garasi sosoro ie, era mio mutu garadabuai-rido. Nedi oromo ro nou bara ato urubia ro se gorowotoi. Nedi urubia ro ibisa neio ro gowamedei-rimo. Ibisa ubi tanaro kisioidiro aboto eresebea pua, ibose ibisa edi ota titi ro emowabu pua. Nu edi namba ro nou masiro na-owapotaiddiro-die neio witoro ato ibose tumodi tu ato imowate pua. Neio idaibo sosoro girimowotoi-rimo koko se. Nedi urubia

ro gita sosoro kiado namo hapu Godi ro erere se ta-gimio, nou se geremebidiro-rimo.

³ Taie Godi edi sowake dubu ro Mose, Sipisipi Dawade mutu neitiro edi wasare ro iato giabodo-rimo, 'Abera Naramu Godi imese pupuwo ia, oro tanaro kisioidiro mutu imese ohu ia ie, imese meana ia ie. Oro eputa dubu e *imese erere duriomoro urubia oro ro iaurititi.* Oro tanaro kisioidiro mutu imese tuputupu ia ie, ibose morobise ia ie.

⁴ *Abera Naramu, oro imese urubia ro tere amadime-emati-ri, ibose oro masiro ohu ia to amadimo-owouburio-ri.* Mabu oro kaupoti nakara se nou se ie tarena dubu. *Beda mutu erere tanaro urubia ra imese duriomoro rido saiki ata namadidimo-ou-ri, oro neio ro nato amadime-emowabu-ri.* Mabu oro edi tuputupu tanaro ro na-gisioidiro urubia ro ta-giauri-rimo.'

⁵ Nedi tanaro ro nou saro gabo ato, mo ina na-nirarowea, mo ro nato nowea Tarena Moto ato Adiri sabowa ato na-gotoi-ro, nou ata masiro Godi edi tarena parai moto ro, nou magerere kodobura se nowea.

⁶ Iedi Tarena Moto goro ro neido iedi 7 sowake urio ro neio ro gosuruwo-rimo, 7 ubauba kororosoidiro namabu erere se nou geremebidiro-rimo. Neio imese marea tato obotama na-gerememiouti-rimo, neito geremeduti-rimo, gorodi gagabe to ta-geremagodeauti-rimo.

⁷ Godi womu tato womu tato keremiro to imidirotiti. Nou edi serawo obo ro gorodi nuku ato irowomidirotiti. Taie iato 4 keremiro nakomu peteibi neibi ata ro 7 sowake urio erere

se iato gimio-ibi.

⁸ *Nou edi Tarena Moto ro gahuta ro ta-gatowouti. Iedi gahuta ro Godi edi auna ia masiro ro pupuwo mutu neitiro giwapotaidiro-marō. Ata dubu ata modobo ia pua edi Tarena Moto ro neito kodoro, womu tato iedi 7 sowake urio ro 7 serawo obo gorodi nuku ato na-gorowomidiro kimawiriti, taie ubauba kororosoidiro to nato amadimo-oroporeai-ri.*

16

Godi edi serawo obo ro 7 nuku ato gorowomidiro

¹ Mo ro ina auna owerā kodu nato nirorowai Tarena Moto goro rido na-gutura-ro ibo, 'Ba-dou-mo, 7 karakara obo nuku Godi serawo edi na to na-iamo duriomoro gebari neito ba-demawiriti-mo!'

² Tuturu to owamo pua keba sowake urio ro goto nato gemawirai, awawo ubauba temeteme ikoni keremapuse kawa aise geremapuse-rimo. Ibisa isabuna etio abato giateidiro-rimo ibose ibisa edi ota titi ro na-gemowabu-rimo, neio ia abato ubauba temeteme ikoni aise geremapuse-rimo.

³ Ina iato tuturu owamo pua ata sowake urio Godi edi serawo karakara nuku obo ro buru oromo nato gemasia. Kemasia saro gabo ato, iedi buru oromo obo ro karima to aise garapoi, pamo urubia karima sosoro gomidiro. Imese sirio keremiro namabu patu buru oromo ato na-oroho-dumo neio aise gorowaburai-rimo.

⁴ Netewa teibo serawo obo nuku teibo sowake urio teibo ro ta-giawirai-marido, ina ata sowake

urio ro gou-ro imese beda mutu oromo sirio ro giamo obo sosu mutu nato gimasia. Neio imese sirio se urubia karima to aise gararapoi-rimo.

⁵ Iato oromo sirio edi urio ro iaurititi, mo ro nou owera kodu se nemororowai ibo na-gutura-ro, 'Godi etu ro gomidiro, ibose etu ro imidirotiti, oro imese tarena ia ie. Oro ro edi ubauba wisa ro na-iaiwo-die imese tuputupu ia se imerio-die nedi urubia ro neio aboto.

⁶ Oro ro nedi tanaro ro nou mabu rido isioidiro mabu oro edi ipusu owera urubia ro, oro edi tarena urubia ro neio mutu, neio ro giopiauti-rimo karima nato garawiriti-rimo. Ina wisana neio edi kidio obo ro karima to nou mabu ato giwaititi.'

⁷ Ina iato owera kodu mo ro nato nirorowai kimatowo patapata rido na-gutura-ro ibo, 'Io Abera Naramu Godi imese pupuwo ia, oro ro ubauba tanaro sapuwo to morobise tuputupu ia tanaro to iaiwotiti-die.'

⁸ Netewa didi serawo obo nuku peteibi ta-giawiriti-birimo, ina ata sowake urio Godi edi serawo obo nuku ro saiki nato gemawirai. Saiki Godi ro pupuwo korosa nato gomia urubia saiki korosa ro ioura ri.

⁹ Iedi atu saiki era korosa ro saiki aboudo na-gou-ro urubia ubauba mino to gioura, ina neio ro Godi masiro erere tau ato imese ubauba gowaititi-rimo. Mabu nedi ubauba tanaro ro na-gororosioidiro-rimo neio abato, Godi ubi ato gororosioidiro-rimo. Kaupoti nedi urubia ro ubauba aboudo nato erewesegere pua, ubauba tanaro neio ro aise gisioidiro-rimo. Ibose Godi masiro neio ro auna owaititi pua.

¹⁰ Netewa netewa sowake urio ro Godi edi serawo obo nuku ro ta-gimawiriti-birimo, ina iato ata sowake urio ro ibisa komidiro nakomu nato gemasia. Nou ro edi duriomoro sirio ro giauri duwo ro aise giahidimai. Ibisa edi urubia ro gobodoro-rimo neio temeteme na-giwaubere-rimo kimarihi se goroho-rimo.

¹¹ Neio ro ina Godi Adiri sabowa ato na-imidirotiti-die masiro ubauba nato gowaititi-rimo, mabu neio auna ikoni temeteme giwaubere-rimo. Kaupoti neio ro beda ubauba tanaro ra na-gisioidiro-rimo, nato erewesegere pua, inaina aise gisioidiro-rimo.

¹² 5 sowake urio ro Godi edi serawo obo nuku ro ta-gimawiriti-birimo ina iato ata sowake urio ro Iupereitisi oromo gebari nato gemasia. Iedi obo gebari ro gomidiro egenabo gomiodoi oromo imese ororo ia se gowamo. Iupereitisi oromo obo beda tau ato gomiodoi nasa rubi sirio saiki kidiowado moro rido neio kiabu gabo gimesioidiro-rimo.

¹³ Mo iato na-nirarowea netewa didi ubauba urio Peteibi se niwia-ibi, neibi kohoke sosoro ie. Neibi erere se gosuwoduti-birimo, ata kanigiri matagoro rido gosuruo-ro, ata oromo ibisa matagoro rido ie, ina ata nou simara karasaubuti ipusu oweru dubu matagoro rido gosuruo-ro.

¹⁴ Neibi imese ubauba ia urio Peteibi ie. Neibi ro awawo korosa tanaro amabimi-isioidiro-ri urubia sirio isaubuti rie. Eputa urubia imese sirio duriomoro gabogabo ato na-orowomidiro ubauba urio Peteibi ro neio amabimi-iraturio-ri. Nedi ubauba urio Peteibi ro eputa urubia sirio

neio boso urubia mutu, neibi ro kaupoti moro to amabimi-idabuti-ri, taie boso aboto atu se nato amadimo-ou-ri. Nedi boso saiki ro imese auna ia saiki ro ama-owamo-ri, imese pupuwo ia Godi nou ro nedi saiki ro kebase ta-gohodowa.

¹⁵ Iesu ro ibo, 'Owera neito ma-dirowidiro-rimo! Piro dubu urubia umoro tato tau beda sosoro kou ra, mo idaibo mino to anamadi-ou-ri, nio ata umoro oi-ri pua. Etio ro irimowotoi-dumo kimibiria mutu ina Godi edi meamea obotama ro araraseperai tato, nedi urubia ro Godi ro meana ama-iwai-ri. Neio porose se oroho-ri pua.'

¹⁶ Nedi ubauba urio peteibi ro erere duriomoro eputa urubia sirio atu moro to iato gidabuti-rimo. Iedi moro to garadabuti-rimo Hiburu owera to asoro-dumo masiro Amagedoni.

¹⁷ 6 sowake urio ro Godi edi serawo obo nuku ro ta-gimawiriti-birimo. Ina iato ata ro gou-ro Godi edi iana ia serawo obo nuku ro nou mutu, taie ohu rido nato gemasia-ro. Tuturu to owamo pua Tarena Moto goro rido Godi edi komidiro nakomu ro owera kodu nou aboudo nato gosuruo-ro, 'Nou se ie imese notoroporeai-dumo!'

¹⁸ Iato penenio aise gerememiouti-rimo. Toboro gururu aupi ato kutura, muso ato kutura ibo gorowati-rimo. Iato auna sopo momuruwo nato goromuruwouti. *Urubia ro idaibo sopo momuruwo kiauri pua, abora ia nakomu gebari ro gororosoidiro, imese auna ia ie.*

¹⁹ Nedi sopo momuruwo ro nou ro iedi auna sabowa ro netewa didi patu to giapepeai-bi.

Ibose duriomoro erere ato, erere awawo sabowa ato, moto sirio aise giwaposoro. Godi ro Babironi sabowa gebari woki emati pua, nou ro ta-gemaragoidiro-ro. Godi edi serawo waini obo ro neio aboto kainai se emagagai pua.

²⁰ Beda mutu ura ro giwadaudiro aise gararaseperai-rimo. Podo na-gorowotoi boito hatu gou-rimo.

²¹ Toboro rido koko daroho nadi iopu sosoro neio ro giretuti-ro, kainai abere mibo beda sosoro ra idaibo mibo ie. Iedi nadi ro na-giretuti-ro urubia neio ro aise giopiauti-rimo. Kaupoti nedi urubia ro Godi masiro ubauba aise gowaititi-rimo. Mabua iedi koko daroho iopu ro na-giretuti-ro imese ubauba mino to giretuti-ro, temeteme neio ro gimio-rimo.

17

Era gabo orobo ibisa ro gowai ubauba

¹ 7 nuku edi sowake urio ro girobidiro-rimo neibi ata ro gutura-ro mo aboto ibo, 'Mo mutu mou-rido, oro mo ro anama-emowawea-ri edi auna masiro era gabo orobo ro, nou ro Godi aboudo beda sosoro ubauba wisa ama-imidai-ri. *Nu sirio oromo ato namabu keremahudirio woko iworohutiti.*

² Erere duriomoro eputa urubia sirio nou aboto na-irohotiti-dumo, era gabo tanaro isioidiro-titi-dumo. Ibose imese sirio urubia nedi sopu duriomoro ro nato na-irowomidiro, nou aboto irohotiti-dumo era gabo tanaro isioidiro ri. Ina nedi tanaro ro neio daradara nou ro iwaititi. Koko obo kidio ato daradara beda sosoro koroho ra, ibo irohotiti-dumo.'

³ Ina iato Tarena Urio ro noworohuti, taie Godi edi sowake urio ro nou ro aise norobai-ro, imese newedei goto se duriomoro to. Mo ro iato kaupoti orobo se nowea, nu karima ia ibisa ato gomidiro. Iedi ibisa ro nato Godi masiro ubauba kowaititi oweri sirio neio ro se giateidiro. Iedi ibisa ro nu 7 eputa mutu e ina 10 gaini neio ro giawotidiro-ro.

⁴ Iedi orobo ro nu meamea ia karima awawo mani obotama neito geremeduti. Nou ro nou giroidiro gorodi namabu, awawo mani nadi kainakaina, nu imese ta-gobodiai keremeduti. Nou ro gorodi panikere se gorobidiro, iedi panikere goro ro nou ato, erere mareamarea tanaro nou edi upo tanaro maumo ato na-iamo, imese sirio ia ubauba marea nibo mutu, neio ro giamo, edi ubauba nibo ro panikere neio ro kagomuti ie.

⁵ Ina nou witoro ato nedi piro masiro ro neio ro giateidiro, Babironi Sabowa Gebari, Era Gabo Tanaro Nou Aboudo Isuwoduti-dioumo, ina Mareamarea Korowaititi Tanaro Nou Aboudo Isuwoduti-dioumo.

⁶ Ina iedi orobo ro mo ro nato nowea, nu koko obo kidio sosoro goroho. Mabu Iesu edi tarena urubia ro na-owautiti-mo nou sapuwo to arua urubia ro ta-giopiauti-rimo, ina nedi orobo ro neio kiopiauti sapuwo to nou koko obo kidio sosoro nou kamade ro owatiti. Ina nu mo ro na-nowea mo iato na-niraroweauti, mo kimaragoidiro ro nopia.

⁷ Ina mo sowake urio ro nato nemodowa-ro, 'Oro kimaragoidiro ro etou ri opia? Oro mo ro piro oweri anama-emowapotai-ri iedi orobo ro

nou sapuwo to, ibose nu edi ibisa ato na-omidiro. Iedi atu ibisa ro nou se ie 7 eputa mutu e, 10 gaini na-giawotidiro-ro.

⁸ Iedi ibisa ro oro ro na-owea nu kebase ta-gomidiro, nu abora omidiro pua, ina ido auna ia bobo rido amadi-erereihai-ri. Kaupoti nu Godi ro era paruo to ama-eherai-ri. Duriomoro ido to gosioidiro, beda urubia ra keremiro namadimo-owea-ri, neio masiro Godi ro buka ato ta-gisioidiro. Kaupoti nedi urubia ro masiro kisioidiro tato, neio kimaragoidiro ro ama-iopia-ri ibisa neio ro namadimo-owea-ri. Mabu kebase nou ta-gomidiro, abora omidiro pua, ina nou ro ama-omidiro-ri.'

⁹ Sowake urio ro ina ibo garo, 'Modobo ie kimaragoidiro maumo mea se kiosora nedi oweru ro nou sapuwo to. 7 eputa io 7 podo iwapotaidiro-die, iedi orobo ro iato imidirotiti.

¹⁰ 7 eputa ibose 7 eputa urubia iwapotaidiro-die, io keba se 5 ta-gorowomidiro eputa urubia to, abora kaupoti ro omidiro, ina ata ido amadi-ou-ri. Nu nama-omidiro-ri, Godi ubi ato nou tuturu to omidiro-ri pua.

¹¹ Keba se edi ibisa ro gomidiro ina abora omidiro pua, nou ro ama-ararasoro-ri eputa dubu to. 7 eputa urubia beda sosoro gorowomidiro, nou ro ama-ararasororo-ri eputa dubu to taie, nou Godi ro nato ama-eherai-ri era paruo to.

¹² Oro ro na-iwia 10 *gaini iwapotaidiro-die ibo 10 eputa urubia* neio eputa urubia to ido amadima-ararasoro-ri. Ina ibisa mutu neio komukere tau to eputa urubia to neito

ama-orowomidiro-ri,

¹³ tanaro neio ro kaupoti ubi to
amadimi-isioidiro-ri, iedi eputa urubia sirio ro
neio edi pupuwo korosa ro ibisa tu to
amadimi-iedea-ri, neio eputa dubu to ararasoro
ri.

¹⁴ Taie nedi urubia ro atu se nato
amadima-aradabuai-ri, boso nato
amadimo-owou-ri Sipisipi Dawade aboto. Ina
Sipisipi Dawade ro etio giapoi nou urubia to, ina
morobise to na-wasorotiti-dumo, neio nou mutu
amadima-aradabuai-ri. Iedi eputa urubia sirio
ro ibisa mutu neio Sipisipi Dawade ro imese
moro to ama-iwororuwo-ri. *Mabu beda mutu
abera naramu sirio, Sipisipi Dawade neio Abera
Naramu e. Ina imese beda mutu eputa urubia
sirio ra, Sipisipi Dawade neio eputa dubu e.'*

¹⁵ Sowake urio ro ibo mo aboto, 'Iedi oromo
sirio ro oro ro na-iwia, era gabo orobo namabu
keremahudirio woko iato na-iworohutiti, iedi
oromo sirio ro erere gu iwapotaidiro-die, erere
tanaro urubia, erere duriomoro urubia, erere
owera urubia io neio ie.

¹⁶ Ina iedi 10 gaini ro oro ro na-iauri ibisa
mutu, neio ro edi era gabo orobo ro
amadimo-ohoio-ri. Ibose nou edi namabu sirio
ro neio ro amadime-emowadaudiro-ri, ina *nou
neio ro nakara se porose se amadime-emeserai-ri.*
Neio ro nou dao amadimo-ouho-ri, ina era to
iato amadime-emosubuwa-ri,

¹⁷ mabu Godi ro nedi 10 eputa urubia ro neio
eputa to ta-giedea nou ubi tanaro aise kisioidiro
aboto. Neio ro ubi to nou mabu ato
gomidai-rimo iedi eputa urubia sirio ro neio edi

pupuwo korosa ro ibisa tu to amadimi-iedea-ri,
womu tato Godi oweru na-iarotiti-ro nedi tanaro
ro nou sapuwo to morobise to nato
amadimo-ororosioidiro-ri.

¹⁸ Iedi era gabo orobo ro oro ro na-owea nou
auna sabowa gebari ie, imese duriomoro eputa
urubia nou ro sopu to iauri-die.'

18

Godi ubi ato Babironi ama-opisiamuti-ri

¹ Kibase edi tanaro ro na-gororosioidiro-rimo
ina nou saro gabo ato, mo ro nato nowea ata
sowake urio Adiri sabowa rido na-gororuworo.
Nedi sowake urio ro auna ia pupuwo korosa
mutu e, ina *nedi duriomoro gebari ro nu edi
woroworo ro nou ro gemowia.*

² Nou ro auna ia oweru to nato giaia-ro ibo,
'*Auna sabowa Babironi ta-were-sebuti, Babironi
sabowa ararasoro-ri pua, imese ta-waratowouti!
Erere ubauba urio sirio nedi sabowa ro neio
komidiro moro to ta-gararapoi. Ibose sirio pawa
mareamarea nibo ohona na-ihotiti-dumo, neio ro
nedi sabowa ro eso mona to gapoi-rimo iato
korowomidiro aboto.*

³ Mabu kibase sirio duriomoro urubia nou ro
ubauba ta-iwaititi, simara ubauba durupi tanaro
ro neito. Urubia dubu ro boinana dubu tuba
na-omio ina nou ro ubauba neito na-owaititi,
Babironi sabowa ro urubia sirio neio nou ro ibo
iwaititi. Erere duriomoro eputa urubia edi era
gabo orobo ro nou aboto aise irohotiti-mo,
idaibo tanaro isioidiro ri. Namabu
keremahudirio urubia nedi duriomoro gebari ro
nato auna mani urubia to ta-gararapoi-rimo.

Mabu nedi duriomoro urubia ro ubi auna ia se iamotiti awawo wisa namabu kimade aboto Babironi aboudo.'

⁴ Taie mo ro ina ata owera kodu nato niorowai Adiri sabowa rido na-gutura-ro ibo, 'Mo urubia, *nedi sabowa ro nio ro demeserai-mo! Dosuruwo-rimo! Iato aise igorowomidiro*, mabu nedi orobo ro ubauba tanaro isioidirotiti, modobo pua nio karadabuai nou ubauba to. Ina ibose modobo pua iedi auna ubauba tau ro nou aboto na-wou-die nio atu se nou ro kirobai.

⁵ *Mabu nou edi ubauba tanaro sirio ro na-isioidirotiti, iedi ubauba nibo ro na-owiorotiti Adiri sabowa imese ta-gowasomai. Babironi ro edi ubauba ro na-isioidirotiti Godi ro woki imati pua, nou ro aise imaragoidirotiti.*

⁶ *Babironi ro beda ubauba isioidirotiti urubia aboto, modobo ie atu sosoro wisa nou ro ba-mimadetiti. Nou ro beda ubauba tanaro isioidirotiti, wisa edi ubauba sirio ro ohu rido aise ba-memotomotiti-mo. Nou ro urubia ubauba kiwaititi sapuwo to wisa ohu rido auna se ba-memotomotiti-mo.*

⁷ Nou ro auna mani namabu beda sosoro imadetiti, nu nakara se auna neito orowaititi. Nu abora temeteme ba-miwaubere, mibo maumo ato aise ba-mimidirotiti. Nu nakara se ta-geremowabu ibo, *Mo eputa orobo sosoro nomidiro, mo garamu orobo sosoro omidiro pua, mo idobi suwosuwo omidiro-ri pua.*

⁸ Ina noudo ie pamo, idobi suwosuwo komidiro, sogoi tau, nedi ubauba tau ro amadima-aratuamudiro-ri. Nou ubauba neio ro amadimo-owai-ri, ibose era ro ama-ouho-ri. Mabu Abera Naramu Godi nu pupuwo korosa

mutu e, nou ro edi ubauba na-isioidirotiti
ubauba wisa Godi aboudo ama-iauri-ri.

⁹ Duriomoro sirio edi eputa urubia sirio ro
nou aboto era gabo tanaro isioidiro ri
na-irohotiti-mo, ibose awawo mani namabu nou
aboudo na-imadetiti-mo, nou era ro
nama-ouho-ri neio ro era gahuta se
amadimi-iauri-ri. Neio iato eputa aise
amadimi-iborea-ri, auna nirimagare ro
ama-iopia-ri, idobi suwo se amadimi-isuputi-ri,
ina koi to iato amadime-emerete-ri.

¹⁰ Neio musomuso se amadi-orowotoi-ri auna
tere ro ama-iopia-ri era korosa iamo
namadime-emewidiro-ri. Neio ro ibo
amadima-aro-ri, "Iau o! Iau o! Babironi oro
imese auna sabowa gebari ro orowati, beda
geremobo natonato ie. Oro tuturu tau to
eremasebidiro pua, erere ubauba wisa sirio oro
aboto ta-gororosioidiro-dumo."

¹¹ Nedi sopu duriomoro ro nato erere namabu
keremahudirio urubia na-orowomidiro, neio
idobi suwosuwo ama-orowotoi-ri Babironi
amadime-emerete-ri. Mabu besinisi namabu
kimade aboto poto ie, ibose namabu kimade
aboto beda urubia ro amadimi-imade-ri, neio
mani tato ie. Besinisi urubia ro nedi namabu ro
nou imade-mo, ina urubia ro iwamade na neio
ie,

¹² gorodi, siriba, awawo mani nadi
kainakaina, mea ia sosoro obotama, sirika
obotama, erere karimakarima obotama, mea
nibo koko ota, erere sosoro namabu awawo
tumu na gaini to na-gisioidiro-rimo, egea mere
karima auri to na-gisioidiro-rimo, koko ia auri to

ina ibose nadi masiro maboro neito
na-gisioidiro-rimo.

¹³ Ohona topo kiwaititi meresini idaibo
sinamon, kani mabu, ibose erere meamea nibo
dehoro, waini obo, oribi isi, parowa, woiti,
burumukau, sipisipi, hosi, kimudidiro nakomu
woiri mutu, wisa tato woko urubia, ina boso ato
kiaubo urubia. Nedi namabu sirio ro urubia ro
imade-ri pua.'

¹⁴ Iedi owera kodu ro mo ro ina nato
nirowidiro. Nou ro ibo, 'Babironi, oro edi
meamea namabu ro giropu na-imatiti abora
boira? Neio ta-gorowadau oro aboudo. Oro edi
awawo wisa namabu ro oro ro ina iwia-ri pua,
imese moro to ta-gararaseperai-dumo.'

¹⁵ Babironi aboudo beda besinisi urubia ro
imadetiti-mo neio mani ta-iaurititi-mo, neio tere
ri muso rido ioudo amadi-orowotoi-ri. Babironi
temeteme iamo nama-emaro-ri, besinisi urubia
idobi suwo se amadimi-isuputi-ri, ina koi to iato
amadime-emerete-ri.

¹⁶ Neio ro ibo, 'Iau o Babironi oro buro, auna
sabowa ro orowati. O Babironi sabowa gebari
oro imese ta-iremedutiti didirididiri obotama to,
bubu obotama to, karima obotama to. Oro
sagaru neito ta-irowaititi gorodi na-iroidirotiti,
awawo mani nadi na-iroidirotiti.

¹⁷ Iedi awawo wisa namabu sirio ro oro ro
na-iworohutiti neio imese ubauba mino to
ta-gipisiamuti-dumo.'

Sawa pe abeamio, sawa pe to koroho urubia,
sawa pe woko urubia, Babironi sabowa muso
rido

¹⁸ amadimi-iauri-ri era gahuta nama-ioro-ri.
Neio auna se nato amadimi-iaiauti-ri ibo, 'Idaibo

sabowa gebari ata nou sosoro owamo pua, auna ia sabowa gebari ie!'

¹⁹ Neio iato era panese se amadimi-imade-ri iato amadimo-orowoititi-ri. Neio idobi suwo se amadimi-isuputi-ri, ina koi to amadime-emerete-ri. Neio ro ibo, 'Iau o! Babironi auna sabowa gebari ie sawa pe gebarigebari abeamio boito gou-dumo? Neio auna mani urubia to nato gararapoi-dumo mabu neio nou aboudo gotobowa-rimo. Eio! Babironi natonato ia ie. Nou edi awawo wisa namabu sirio ro neio imese ubauba mino to ta-gipisiamuti-dumo.

²⁰ Adiri sabowa ato nio etio ro orowomidiro, Babironi sabowa ubauba wisa sapuwo to nio kamade ro ba-diwati. Godi edi tarena urubia ro, Iesu edi kitiodorai urubia ro, Godi edi ipusu owera urubia ro nio atu se kamade ro diwati. Nio Babironi ro ubauba mino to na-iworohutiti nu Godi ro nio sapuwo to owai ubauba.'

²¹ Owera kodu karo na-goporeai, ata auna pupuwo sowake urio auna nadi gohi gebari nato goumai-ro, idaibo woiti kituti nadi sosoro ie. Iedi nadi ro nou ro na-gowoubua-ro, taie aise geherai-ro buru oromo to. Sowake urio ro ibo, 'Babironi sabowa, oro idaibo mino to ama-oroporeai-ri. Urubia ro owea-ri pua, imese moro to ama-aratowouti-ri.

²² *Gita sosoro kiado diamo, ibose wasare keremaboduti, dowe ugeuge kiourio, humuko kiourio, oro abato iedi diamo ro ido irowidiro-ri pua. Erere woko umoro urubia ido oro abato woko isioidiro-ri pua. Ohona kisioidiro diamo*

ido oro abato irowidiro-ri pua, iedi diamo ro imese moro to amadima-araraseperai-ri.

²³ *Erempa pina oro abato iriware-ri pua, imese moro to amadimo-orodouti-ri. Orio kararemo urubia neio keremowauti oweru ido oro abato eremowauti-ri pua. Oro ubauba ro nou mabu rido gorobai-die, mabu oro edi besinisi urubia ro kebase neio duriomoro ato awawo masiro urubia to irarasorotiti-mo. Oro ro pakani tanaro auna se ta-isioidirotiti, ina sirio duriomoro urubia oro ro kakate gabo to idaibo mino to ta-isaubutiti.*

²⁴ *Babironi oro ubauba ro nou mabu rido orobai-die, mabu Godi edi ipusu oweru urubia ro ibose nu edi tarena urubia ro neio edi karima ro iato garawiriti-rimo. Ibose nedi sopu duriomoro gebari ro nato etio giopiauti-rimo neio edi karima ro Babironi oro abato giwia-rimo.'*

19

Sirio urubia ro Godi gemowabu-rimo

¹ *Kebase tanaro ta-gororosioiido-rimo, ina mo ro nato nirorowai oweru togo Adiri sabowa ato na-gotobowa-ro. Nedi urubia sirio ro kamade ri giaiauti-rimo ibo, 'Iawe se memowabu-rimo! Auna masiro pupuwo korosa mutu Godi abato ba-miamotiti. Nimo ubauba aboudo nou ia ro niapopo-ro.*

² *Mabu nou ia ro wisa kiaiwo ato, nou ro morobise mino to, ibose tuputupu mino to kimeiuoti ie. Iawe Godi se memowabu-rimo! Mabu nou ro nedi auna era gabo orobo ro koto ta-gowai. Nou ro nedi duriomoro ro nato urubia*

sirio ubauba ta-giwaititi, nou edi ubauba durupi ubi tanaro ro neito. Nedi era gabo orobo ro Godi ro ubauba wisa ta-gomia mabu nou ro giopiauti Godi edi sowake urubia ro.'

³ Tutura to owamo pua oweru togo urubia sirio aboudo ina nato gotobowa-ro kamade ri neio nato giaiauti-rimo, 'Iawe memowabu-rimo! *Nou aboudo era gahuta womu tato womu tato aise owiorotiti-die.*'

⁴ Taie iato 24 eputa urubia, 4 keremiro nakomu peteibi mutu aise giroruo-ibi kauhio to Godi neibi ro iato gemowabu-birimo. Nou ro imidirotiti ohu komidiro nakomu ato neibi ro nou gemowabu-birimo. Neibi kemowabu oweru auna se ibo garo-birimo, 'Ibose ba-mororosioi-di-ro-mo! Iawe se memowabu-birimo!'

⁵ Iato mo ro ata oweru kodu ohu komidiro nakomu rido nato nirorowai ibo na-gutura-ro, 'Nio etio ra nou sowake urubia *Godi tere na-ematiti-dumo, nio arua awawo masiro na-irobidi-ro-dumo ina nio arua dorogora urubia ie*, modobo ie nio ro Godi kemowabu.'

⁶ Tutura to owamo pua ina mo ro urubia sirio oweru sosoro nimororowai, idaibo kadeidiro obo diamo sosoro, ibose gururu sosoro diamo aise geremohumo-ro. Iedi urubia sirio ro kamade ri aise giaiauti-rimo, 'Iawe se memowabu-rimo! Mabu nimo Abera Naramu Godi imese pupuwo ia ie, imese namabu sirio nou ro iauri.

⁷ Nimo kamade ro auna ia se miwati-ro, nou masiro ohu ia to mowiourio-rimo. Mabu Sipisipi Dawade orobo kedea tau ta-gorobai-die, ina nu orobo ta-geremododiai nou ro kedea aboto.

⁸ Nedi orobo ro mea didiri marea tato obotama orori na ta-gomia-rimo.' (Mea didirididiri marea tato obotama owapotaiddiro-die meamea tanaro Godi edi tarena urubia ro neio ro na-isioidiro-dumo.)

⁹ Iato mo sowake urio ro nedi oweru ro nou nemowapotai-ro, 'Nedi oweru ro oro ro buka ato aise ba-disioidiro, Godi ro oweru etio aboto gimerio Sipisipi Dawade marete soriomu aboto ou ri, nedi urubia ro neio ro Godi aboudo meana kiwia ie.'

Nou ro ibose nedi oweru ro nou gadabuui-ro, 'Nedi oweru ro kebase na-naro nou morobise oweru ie Godi aboudo ie.'

¹⁰ Mo ro nedi oweru ro na-nirorowai sowake urio sairo mabu ato egenabo nereteamoidiro nou emowabu rie. Kaupoti sowake urio ro mo aboto oweru simara se gutura-ro ibo, 'Idaibo tanaro osioidiro ate! Godi ia se ba-demowabu! Oro ie, mo ie, oro borubi kimibiria urubia mutu morobise oweru Iesu sapuwo to na-imowauti-dumo, nimo imese Godi sowake urubia ie. Etio ro imowauti-dumo morobise oweru Iesu sapuwo to, neio Godi ipusu oweru urubia sosoro ie.'

Iesu ro ta-giwamedei-ma ibisa nou ipusu oweru dubu mutu

¹¹ Toboro ohu to ina nato nawota ei! Adiri sabowa magere korodobura se nowea. Mo sosoro gabo ato keakea hosi se nowea na-gotoi. Hosi ohu ato edi dubu ro gomidi-ro nu masiro ibo ie 'Nou ro beda oweru karo ra aise kosioidiro ie'. Nu ata masiro 'Morobise'. *Urubia nou ro wisa tuputupu mino to kimowame ie erere tanaro kisioidiro sapuwo to. Nou ro urubia boso*

kimowou ato, nou ro boso tuputupu mino to kisioi diro ie.

¹² Nu idomari teibo era pina sosoro iriwaretiti-do, ibose nou eputa ato sirio eputa dubu hatō ta-geremamiti. Nou durupī ato ata sosoro masiro ro gatei diro, urubia umoro pua, nu ia nakara umoro ie iedi masiro ro.

¹³ Nou ro tuturu sedo goroi diro, boso urubia nou ro na-giopiauti neio *edi karima ro sedo nou ro aise gorobai*. Edi dubu ro nu masiro ‘Godi Owerā ie’.

¹⁴ Adiri sabowa rido erere patu boso koroho urubia nu saro rido aise gobodoro-rimo. Nedi boso urubia ro imese sirio ia ie, neio meamea keakea marea tato obotama neito geremeduti-rimo, neio ro ibose erere se keakea hosi to gou-rimo boso aboto.

¹⁵ Neio edi boso eputa dubu ro nou matagoro rido susura giri nou ro se gasomai diro-ro, duriomoro urubia sirio iedi giri ro neito iopiauti rie. *Sirio duriomoro saiki ata nou ro eputa dubu edi auri gamini ro urubia sirio nou ro neito koko muro to ama-iwaboi-ri*. Nedi dubu ro nou ro gereipi iopu ama-ituti-ri, kituti moro rido karima obo isi ioudo amadimi-isuwoduti-ri. Iedi kituti moro ro nato Godi imese pupuwo ia dubu nu niro pupuwo kemagagai moro ie.

¹⁶ Nu sedo ato ina urumere ato nedi masiro ro nou ro gatei diro, *Imese beda mutu eputa urubia sirio, Sipisipi Dawade neio eputa dubu e. Ina beda mutu abera naramu sirio, Sipisipi Dawade neio Abera Naramu e*.

¹⁷ Mo ro ata sowake urio nato nowea saiki ato na-gotoi-ro. Iedi sowake urio ro erere pawa sirio

toboro ato na-gorowadaudio neio nou ro nato
gimowapotai auna oweru to ibo, *Godi ro auna
soriomu ama-osioi-di-ro, nio nedi soriomu ro
nou aboto ba-daradabuti-rimo!*

¹⁸ *Nio nou ri nirumai eputa urubia sirio, boso
awawo urubia, boso abato pupuwo to koroho
urubia, hosi neio simara kiwararioi-di-ro urubia
mutu, simara woko kisioidi-ro urubia, urubia wisa
tato woko na-imesioi-di-ro-dumo, masiro tato
urubia, awawo masiro urubia, imese sirio urubia,
neio pamo durupi nio ro amadimi-iho-ri.*

¹⁹ Mo iato na-nirarowea ibisa se nowea eputa
urubia sirio mutu, erere duriomoro rido
na-goroho-rimo, neio kaupoti moro to
gorowoiriamuti-rimo. Neio simara boso koroho
urubia mutu gou-rimo, keakea hosi ato edi na ro
gomidi-ro boso nou aboto gowou-rimo nou
simara boso urubia mutu.

²⁰ Kibase, karasaubuti ipusu oweru dubu ro
sirio pupuwo korosa tanaro ta-gisioi-di-ro oromo
ibisa ubi maumo ato. Nedi pupuwo korosa
tanaro ro neito urubia sirio nou ro ta-gigediuti.
Nedi urubia ro ibisa edi isabuna ro
na-gimade-rimo, ibose nou edi ota titi ro
na-emowabutiti-mo, io nou ro neio se gigediuti.
Kaupoti ibisa, nou karasaubuti ipusu oweru
dubu, ibose nou edi boso urubia sirio ro neio
mutu, keakea hosi ato edi na ro gomidi-ro
neio nou pupuwo mutu modobo ia pua. Nou ro
ibisa nato aise gorobai, karasaubuti ipusu oweru
dubu mutu. Ibisa ra karasaubuti ipusu oweru
dubu ra neitiro nou ro keremiro se giherai-ma
era paruo to, agoago nadi era bato
irewaretiti-die.

²¹ Neitiro edi boso urubia ro, keakea hosi ato edi na ro gomidiro-ro giri sapuwosapuwo susura nou matagoro rido na-gasumawado-ro, neio neito giopiauti. *Neio edi pamo durupi sirio ro pawa sirio nato garageai-rimo, modobo pua neio ro kiho to kiporeai.*

20

Satani ta-gemotohiti 1,000 kisimisi to ama-orobuti-ri

¹ Ina mo ro nato nowea sowake urio Adiri sabowa rido na-gororuwo-ro. Nou auna bobo magere ki, ibose seni gebari mutu nou girobidiro-marō,

² nou ioudo na-gou-ro kanigiri gebari nou ro aise gohia, iato gemotohiti 1,000 kisimisi to ibose to ama-imidirotiti-ri. Iedi kanigiri ro tagara bagawe ie, kararasoro orora, Satani nou se ie.

³ Nu sowake urio ro aise gigirimaidiro auna bobo to, magere na-gemopai, taie isabuna iato gemedea, nu iato imidirotiti 1,000 kisimisi to. Satani iato noudo ama-imidirotiti-ri, nou ina gabo tato ie urubia kisaubuti aboto, womu tato 1,000 kisimisi namadimo-oroporeai-ri, taie nou egea mere tau to gabo nato amadime-emodobura-ri osuruwo ri.

⁴ Nedi tau ro nato mo ro eputa urubia korowomidiro nakomu se niwia, neio ato urubia se gorowomidiro. Nedi urubia ro neio Godi ro ta-giapoi urubia sirio koto kiwaititi aboto. Arua kimibiria urubia ro owera Iesu sapuwo to na-imowautiti-mo, ibose neio ro Godi owera

aboudo koko se na-irarebidirotiti-mo, neio arua urubia ro nou mabu ato giariauti-rimo. Nedi urubia ro ibisa, ota titi mutu neitiro neio ro imowabutiti-ma pua, ibose neio eputa ato ibisa edi isabuna ro imaremo pua, tu ato imaremo pua. Neio Godi ro keremiro to nato giwameai-ro.

⁵⁻⁶ Neio ro Iesu mutu urubia sirio iaurititi-mo 1,000 kisimisi to. Nedi tau ro nato nou keba tau e, urubia sirio Godi ro pamo rido atu se na-giwameai-ro. Neio imese nou ro meana kiwai ie, ina ibose tarena kiwai ie. Neio pamo ina iauri-ri pua, era paruo to ihere-ri pua. Neio ro Godi ra Iesu ra atu se aise amadimi-imowabutiti-mari, Iesu mutu urubia sirio neio ro amadimi-iaurititi-ri 1,000 kisimisi to. Arua urubia Godi ro pamo rido tau se iwameai pua, womu tato iedi 1,000 kisimisi ro namadimi-oroporeai-ri.

Godi ro Satani nato gowororuo

⁷ Iedi 1,000 kisimisi ro namadimo-oroporeai-ri Satani Godi ubi ato dibura ato na-imidirotiti sowake urio ro magere nato amadi-emodobura-ri.

⁸ Taie nou ioudo nato amadi-osuruwo-ri, imese duriomoro urubia sirio nou ro isaubuti ri, Godi edi nasa urubia ro *Goga ra Magoga ra* to na-iasoro-madumo, nou ro aise ama-idabuti-ri, taie boso aboto nato ama-iworoho-ri. Neio imese sirio ia ie, ota puara imese morobiritai-rimo idaibo sosoro ie kioputi modobo pua.

⁹ Neio imese duriomoro gabogabo rido aise garadabuti-rimo, taie imese gidiai-rimo, Godi edi tarena urubia ro aimara sabowa ato na-gorowomidiro neio aboto, neio ro iato

gimowaperai-rimo iopiauti rie. Nedi aimara sabowa ro nou auna sabowa ie, nedi urubia ro nato na-orowomidiro neio Godi ro nirimagare imatiti-die. Kaupoti Godi ro toboro rido *era aise geherai-ro duriomoro urubia sirio neio edi boso urubia sirio ro imese era ro aise gipisiamuti.*

¹⁰ Ina iedi kararasoro dubu ro Satani neio etu ro isaubutititi, nou Godi ubi ato era paruo to aise gepeduai-rimo. Iedi era paruo ro korosa ia nadi era bato irewaretiti-die, Godi ro keba se ibisa nu simara karasaubuti ipusu owera dubu mutu atu se ito ta-giherai-ma. Neibi atu se imese womu tato womu tato temeteme ro iato aise ama-iwauberetiti-biri.

Pamo urubia Godi ro koto giwai

¹¹ Mo iato na-nirarowea eputa dubu auna keakea komidiro nakomu se nemowea nou ato Godi ro gomidiro. Toboro ra duriomoro ra Godi sosoro gabo rido imese moro to aise gararaseperai-rido.

¹² Mo ro imese sirio pamo urubia se niwia, awawo masiro urubia, masiro tato urubia, nedi urubia ro eputa dubu komidiro nakomu sosoro gabo ato gorowotoi, ibose *buka sirio erere se gimaputi-rimo.* Ata buka ato womu tato womu tato keremiro etio ro amadimi-imidai-ri, neio masiro iato tiamo, nedi buka ro ibose to gemapimai-rimo. Nedi pamo urubia ro koto Godi ro iedi tau ro nato giwai neio ro beda tanaro isioidirotiti-mo, Godi ro buka ato keba se ta-gisioidiro.

¹³ Obo pamo edi urubia ro giauri-rimo koto aboto ibose aise gidiai-rimo. Bobo goro ato iedi

pamo urubia ro girobu, ibose Dudi ato iedi pamo urubia ro gorowomidiro, neio koto aboto ibose ta-gou-rimo. Urubia Godi ro koto erere se giwai neio duriomoro ato beda tanaro isioidirotiti-mo.

¹⁴ Taie Pamo, Dudi mutu neitiro era paruo to Godi ro aise giherai-ma. Era paruo owamo ibo saro tau e urubia pamo ro kiwia aboto, Godi aboudo imese moro to kararaseperai ie.

¹⁵ Etio ra keremiro kowea sapuwo to neio masiro buka ato kiamo tato, iedi urubia ro Godi ro era paruo to aise gipedu.

21

Orio sabowa ohu rido gororuo-ro

¹ Mo ro iato orio Adiri sabowa, orio sopo duriomoro mutu neitiro se niwia-ma. Keba se iedi Adiri sabowa ro gowamo sopo duriomoro mutu, neitiro teibo ta-gararaseperai-rido, boito hatu gou-rido. Ibose buru oromo gebari iedi na ro owamotiti ta-gararaseperai.

² Mo ro iato Godi edi tarena sabowa gebari ro nou se nowea, orio Ierusarema Godi aboudo na-gororuwo-ro Adiri rido. Nedi sabowa ro idaibo sosoro ie, Godi ro mea mino to ta-gemododiai meamea namabu to ta-gemeduti nou idaibo uramu ro edea rie.

³ Mo ro ina owera kodu komidiro nakomu aboudo nato nirowai auna se na-gutura-ro ibo, 'Owera neito dirorowai-rimo! *Abora Godi urubia mutu atu moro ato ama-irowomidiro-ri, neio nou ro simara urubia to ama-iapoi-ri. Ina Godi neio mutu iato ibose to ama-imidirotiti-ri, ina nu neio ro amadime-emowabutiti-ri.*

⁴ Imese mibo patu nedi urubia ro neio aboudo ama-ibedai-ri, neio mibo tato ama-irowomidirotiti-ri. Iedi sabowa ro nato urubia *korowaburo tato ama-irowomidiro-ri*, pape tato ie iedi sabowa ro nato. *Idobi iroto-ri pua*, temeteme iato iwaibia-ri pua. Keba komidiro muro pоторо ie, iato imese moro to ta-gararaseperai-rimo, abora orio komidiro muro ie.'

⁵ Komidiro nakomu ato edi dubu ro gomidiro nou ro ibo, 'Ma-dowea, mo ro imese sirio tanaro orio tanaro to niwesegerai-die.' Nou ro ina owera iato gutura-ro, 'Nedi owera ro dese to na-naro buka ato aise ba-disioidiro. Neio morobise to aise amadimo-ororosoidiro-ri, neio koko se kirobidiro modobo ie.'

⁶ Nou ro ina mo aboto ibo, 'Taie nedi tanaro sirio ro ta-gororosoidiro-dumo. Keba moro mo do ie, saro gabo mo do ie, imese namabu mo ro ta-nimapogai. Karatamuai moro mo do ie, ina womu mo do ie. Etio ra obo sogoi ro na-iwati obo gabibiri na-ororuwo-die, iedi keremiro kimio obo ro neio mo ro nou anama-imapoi-ri idio ri. Nou sapuwo to ata wisa tato ie, kidio kawa amadimi-idiotiti-ri.

⁷ Nio etio ra koko se na-iwotoi-dumo, ubauba tanaro na-iwameduti-dumo, Godi ro edi tanaro na-imasogoro-die neio ia ro amadimi-imade-ri. *Mo neio Abera Naramu to anama-ararasoro-ri. Ina neio mo merebusere to amadima-ararasoro-ri.*

⁸ Kaupoti etio ra mo kowasoro aboudo tere ri na-gararaseperai-rimo, kimibiria tato urubia, siripo tanaro kisioidiro urubia, urubia kiopiauti urubia, upo koroho urubia, pakani urubia, orora

kiroru urubia, karasaubuti urubia, neio iato ama-irowomidiro-titi-ri era paruo ato agoago nadi era bato irewaretiti. Neio ata sosoro pamo ina amadimi-iauri-ri, Godi aboudo imese moro to amadima-araraseperai-ri.'

Orio Ierusarema sabowa sowake urio ro ibo gemabuti

⁹ Godi edi 7 serawo obo ro nuku ato na-irowomidiro-titi iedi 7 sowake urio ro na-girobidiro-rimo, neibi ata ro gou-ro mo aboto, nou ro ibo, 'Dou-ro oro mo ro orio Ierusarema sabowa anama-emasouti-ri, nu besere sosoro ie Sipisipi Dawade ro ta-gedea.'

¹⁰ Mo iato Tarena Urio ro noworohuti taie sowake urio ro aise norobai *auna ia podo ohu to imese noworo. Mo nou ro ioudo nemasouti-ro iedi tarena Ierusarema sabowa gebari ro*, Adiri sabowa rido na-gororuworo Godi aboudo.

¹¹ *Godi edi woroworo ro iedi auna sabowa ro nou ro na-nemowawe-ro, imese woroworo ia se gowamo.* Iedi auna sabowa ro iedi mino to gerememiouti mea ia auna ia wisa nadi sosoro gerememiouti, iesipa nadi sosoro ie, ibose garasi sosoro ie imese aise gerememiouti.

¹² Nedi sabowa ro auna boroboro imese tuturu ia kara to ta-gemowagoberai-rimo, kara goro ato giamo 12 magere. Ina iedi 12 magere ro 12 sowake urio erere se gimotoi-rimo. *Isiraere urubia 12 gu magere gabogabo ato neio gu masiro ro giateidiro-rimo.*

¹³ *Saiki kidiawado moro rido netewa didi magere peteibi ro giaidiro-ibiro, ina saiki korioduti moro rido netewa didi magere peteibi ro giaidiro-ibi, sie sapuwo rido netewa didi*

magere peteibi giaidiro-ibi, nigori sapuwo rido netewa didi.

¹⁴ Iedi auna sabowa kara ro 12 nadi goto maumo ato nou giwotobowa-rimo. Ina iedi 12 erere nadi ro nato Sipisipi Dawade edi kitiodorai urubia ro neio masiro erere se iateidirotiri.

¹⁵ Mo owera iedi sowake urio ro nemowou-ro nou ro kodoburio gonopu se gorobidiro-ro. Iedi kodoburio gonopu ro gorodi rido gosioidiro-rimo sabowa gebari odoburio na, magere sirio, pari sapuwosapuwo idoburio na ie.

¹⁶ Sabowa gebari boroboro tuturu atu sosoro mako ato giamo. Sowake urio ro iedi sabowa gebari ro nato godoburio, gorodi kodoburio gonopu to. Nou ro na-godoburio, nu umoro nato goi ibo nedi sabowa ro tuturu 2,400 kiromita ie, ohu to na-godoburio 2,400 kiromita ie. Sabowa boroboro 2,400 ie.

¹⁷ Sabowa iedi kara to na-gemopai-rimo nato gowea 65 mita kara tuturu ibo ie. Nedi modobo ro na-gomidai urubia dubu tu kauhio rido tu mopokoi to neito godoburio, nou ro ibo godoburio 144 tau to, nou owamo ibo 65 mita.

¹⁸ Kara Godi ro na-gosioidiro iesipa mea ia sosoro nadi neito gosioidiro, sabowa ia agoago nadi gorodi ata marea tato nadi neito gosioidiro garasi sosoro imese ata marea tato ia ie.

¹⁹ Nadi kara edi na to gadiouti-rimo erere titi nadi to gimeduti-rimo. Keba nadi masiro iesipa nou karima nadi ie o gititi nadi ie neito gemede-rimo, nou abo bubu nadi sapaia neito gemede-rimo, ina nou abo karesedoni nadi erere

titi mutu e neito gemedè-rimo. Ina nou abo gititi nadi ie masiro emera neito gemedè-rimo,

²⁰ ina ata nadi karima to kasiouti masiro sadonikisi neito gemedè-rimo, ina ata kaneria nadi to gemedè-rimo urubia durupi karima beda sosoro ra ibo ie. Ina ata nadi kirisorai neito gemedè-rimo nou agoago nadi ie, ina ata beri nadi to gemedè-rimo gititi nadi ie, ina ata topasi nadi to gemedè-rimo agoago nadi ie. Ina ata gititi nadi kisopere nadi ie. Ina ata nadi huakini nadi to gemedè-rimo karima nadi ie o agoago nadi ie. Iana nadi ametisi nadi to gemedè-rimo bubu nadi ie.

²¹ Iedi sabowa ro 12 magere ro giaidiro ina neio 12 awawo wisa keakea nadi magere ie. Kaupoti keakea nadi boroboro kaupoti magere ie. Sabowa turi ato auna gabo imese marea tato gorodi gabo ie, garasi beda sosoro ra ibo ie.

²² Iedi sabowa ro nato mo ro tarena moto owea pua, iato otoi pua. Mabu Abera Naramu Godi imese pupuwo ia, Sipisipi Dawade mutu neitiro tarena moto nou se ie, urubia sirio ro neitiro paease amadimi-imowabutiti-mari.

²³ Iedi sabowa ro nato saiki tato ie ibose sagana tato ie, mabu auna ia woroworo Godi ia aboudo imewititi. Ibose Sipisipi Dawade sabowa erempa sosoro imewititi.

²⁴ *Urubia sirio duriomoro gabogabo ato nedi woroworo ro nato amadimo-oroho-ri. Eputa urubia ro sirio duriomoro gabogabo rido neio ro meamea sosoro namabu amadimi-iworoho-ri nedi sabowa ro neito Abera Naramu aboto iaiwo ri.*

²⁵ Iedi sabowa ro nato magere ibose to ama-iaidiro-titi-ri mabu duwo tato ie iato, imese

woroworo ia se owamotiti.

²⁶ Imese sirio duriomoro urubia ro simara mea ia sosoro namabu, ibose beda namabu sapuwo to na-eremowabutiti-dumo, neio ia amadim-iwodouti-ri nedi sabowa ro neito.

²⁷ Nedi sabowa ro ata ubauba tanaro ata neito odoro-ri pua. Ina ibose etio ra ubauba ia nibo tanaro kisioidiro urubia, karasaubuti tanaro kisioidiro urubia, nedi sabowa ro neito beda kodoro pua. Kaupoti etio masiro ro iamo Sipisipi Dawade edi buka ro nato keremiro kowea sapuwo to, io neio ro se amadimo-odoro-ri nedi sabowa ro neito.

22

¹ Iedi atu sowake urio ro mo nou ro ina nato nemowapotai-ro keremiro kimio oromo obo. Iedi obo ro imese garasi ia sosoro gerememiouti, ata pokiri iopu tato ie. Iedi obo ro Godi ra Sipisipi Dawade ra neitiro iedi komidiro nakomu ro ioudo ororuwotiti-die.

² Sabowa turi ia ato gabo iato gowamo, ina oromo ro gabo turi noko ia to gapepea-ro. *Oromo bara ato keremiro kimio ota iopu kiho ato iato itoititi. Ina ibose oromo ata sapuwo ato ata keremiro kimio ota ibose to itoititi. Iedi ota teibo ro neido sogomi gabogabo ato erere iopu aise iasesutiti-dumo. Ota teibo iedi puara ro na-iwotoititi-do meresini ie duriomoro gabogabo urubia meana neito iwaititi ri.*

³ Nedi sabowa ro nato beda namabu ra o urubia ra Godi ro keba se oweru to ubauba na-giwai, iato pua ie. Godi ra Sipisipi Dawade ra neitiro iedi komidiro nakomu ro iato aise

ama-owamotiti-ri. Godi edi sowake urubia ro nou neio ro aise amadime-emowabutiti-ri.

⁴ Nou sosoro neio ro amadimi-iauri-ri, ina nou masiro neio witoro ato ama-iateidiro-ri, paease iwapotaidiro ri ibo neio Godi do ie.

⁵ Iedi sabowa ro nato duwo ama-araraseperai-ri mabu Abera Naramu Godi neio erempa ie, woroworo nou aboudo amadi-osuruwo-ri. Taie eputa urubia to womu tato womu tato neio ro ama-irowomidiro-ri.

Iana umoro ower a ie

⁶ Iedi atu sowake urio ro ower a mo aboto ina nato garo-ro. Nou ro ibo, 'Nedi ower a sirio ro oro ro na-irowidiro morobise to amadimo-ororosioidiro-ri, koko se kiroidiro modobo ie. Abera Naramu Godi, nou ipusu ower a urubia neio urio aboto, ower a nou ro iarotiti-die. Nou ro ibose sowake urio ta-gemeiriai-ro nou sowake urubia imowapotai ri ibo beda tanaro ra ororosioidiro ri Godi ro na-giapoi, aupise ie morobise to kororosioidiro.'

⁷ Iesu ro ibo, 'Ower a neito ma-dirorowai-rimo! Tau musomuso se owamo pua mo korowameai aboto! Etio ro isioidiro-dumo Godi ipusu ower a nedi buka ro nato na-iamo, nedi urubia ro Godi ro neio korosa ama-iwaititi-ri.'

⁸ Mo Ioane ie, nedi ower a sirio ro sowake urio ro giwapotai-ro, mo ia simara gare to nirowidiro, ibose beda tanaro ro gororosioidiro-rimo mo ro simara ia idomari to niauri. Mo iato kauhio to aise nirimusubua, sowake urio sairo mabu ato nou emowabu rie.

⁹ Kaupoti nou ro ibo gutura-ro mo aboto, 'Idaibo tanaro mo aboto aise gosioidiro-ro! Mo oro mutu neitiro atu se sowake dubu teibo ie,

Godi ipusu owera urubia, oro kimibiria naminiramio, nimo atu se nedi buka owera ro nimo ro na-nibodorotiti-dumo, nimo nou sowake urubia ie. Oro ro Godi se ba-demowabu!

¹⁰ Mo nou ro ina nato nemowapotai-ro ibo, 'Nedi ipusu owera sirio ro nedi buka ro nato na-iamo oro ro koko iwaititi mamu, paease ba-miamo urubia ro ioputi ri. Mabu tau aupiaupi ro orobowado-die nedi tanaro sirio ro kororosioidiro aboto.

¹¹ Etio ra ubauba tanaro na-isioidiro-dumo, neio simara se ubauba tanaro aise ba-misioidiro-mo. Etio ra maremarea tanaro na-isioidiro-dumo, neio simara se mareamarea tanaro aise ba-misioidiro-mo. Etio ra meamea tuputupu tanaro na-isioidiro-dumo, neio ro ibose ba-misioidiro-titi-mo meamea tuputupu tanaro. Ina ibose etio ra tarena urubia to na-ararasoro-dumo, neio tarena mino to ba-mirowomidiro-titi.'

¹² Iesu ro ibo, 'Owera neito ma-dirowidiro-rimo! Tau musomuso se owamo pua mo korowameai aboto, *imese urubia sirio beda tanaro gisioidiro-rimo wisa kimio sapuwo to.*

¹³ Keba moro mo do ie, saro gabo mo do ie, imese namabu mo ro ta-nimapogai. *Keba moro ato ti-nitoititi, saro gabo ato ti-nitoititi-die, imese namabu sirio mo ro ta-nimapogai, mo do ie.* Karatamuai moro mo do ie, ina womu mo do ie.

¹⁴ Obotama etio ro giwiouti-rimo, mo sosoro gabo ato marea tato namadimi-iwotoi-ri, nedi urubia ro Godi ro korosa neio kiwai ie. Ina noudo ie nedi urubia ro Godi ro modobo ama-iwaititi-ri sabowa gebari edi magere ro

neito kodouti aboto. Ina ibose keremiro kimio ota iopu nou ro ama-imapoi-ri neio ro kiho aboto.

¹⁵ Kaupoti etio ra amadime-eremeserai-ri, auna sabowa to odoro tato, neio ibo ie, orora kiroru urubia, pakani urubia, soka urubia, upo koroho urubia, urubia kiopiauti urubia, auna kamade mutu karasaubuti tanaro kisioidiro urubia, ina durupi to aise kisioidiro ie. Nedi urubia sirio ro Godi edi sabowa ro neito odoro-ri pua.

¹⁶ Mo Iesu e, sowake urio mo ia ro nemeiriai nio aboto nedi tanaro sirio ro iwapotai ri, Godi urubia umoro iwaititi ri. Mo auna eputa dubu e gu Deibidi aboudo orobu-die, Deibidi edi bobo ro mo ro korobai ie. Mo Idiai kiboni sosoro ie, orio saiki kowaroho ato mo ro kimewia ie.'

¹⁷ Tarena Urio, Sipisipi Dawade edi orio orobo ro nou mutu, neitiro ro ibo iarotiti-dioudo, 'Modobo ie neito kou!'

Ibose nedi buka owera ro etio ro amadimi-irowidiro-ri, neio ibo ba-miarotiti-mo, 'Modobo ie neito kou!'

Obo sogoi ro etio iwati, ba-mou-rimo obo idio ri. Etio abato ubi na-iamo, nedi keremiro kimio obo ro wisa tato se ba-midiotiti-mo.

¹⁸ Mo aboudo koko owera nou e. Imese beda mutu urubia ro namadimi-irowidiro-ri Godi edi ipusu owera ro na-iamo nedi buka ro nato, nou ohu rido beda urubia ro itomo-dumo, neio ibose Godi ro iedi ubauba ia tanaro sirio ro nedi buka ro nato na-iamo, nedi urubia ro neio aboto ama-iaiwai-ri.

¹⁹ Nedi buka ro nato Godi ipusu owera sirio ro na-iamo, neio aboudo etio ro namadimi-iwagare-ri, neio Godi ro imapoi-ri

pua keremiro kimio ota iopu kiho aboto. Neio ibose Godi ro imapoi-ri pua nou edi tarena sabowa ro neito kodoro aboto. Nedi keremiro kimio ota ro, Godi edi tarena sabowa ro nou mutu, neitiro sapuwo to owera tiamo nedi buka ro nato.

²⁰ Iesu ia ro imowauti-die nedi owera ro ibo, nedi owera sirio ro na-iamo nedi buka ro nato imese morobise owera ie. Nou ro aro-die ibo, 'Io morobise ie! Mo aupise ie anamadi-orowameai-ri.'

Ibose ba-mororosioi diro-mo! Abera Naramu Iesu, dou-ro!

²¹ Abera Naramu Iesu edi wisa tato nirimagare ro imese kimibiria urubia mutu aise ba-mowamotiti. Nouse ie.

Tareka Buka
Portions of the Holy Bible in the Bamu language of
Western Province, Papua New Guinea
Buk Baibel long tokples Bamu long Niugini

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4